


新

唐

書

二
一



十一宗諸子列傳第七

唐書八十二

端明殿學士兼翰林侍讀學士龍圖閣學士朝請大夫守尚書吏部侍郎充集賢殿脩撰臣宋祁奉

敕撰

玄宗三十子劉華妃生琮第六子琬第十二子璿趙麗妃生瑛元
獻皇后生肅宗皇帝錢妃生琰皇甫德儀生瑤劉才人生琚武惠
妃生一第十五子敏第十八子瑁第二十一子琦高婕妤生璵郭順
儀生璘柳婕妤生玢鍾美人生環盧美人生璪閻才人生玘王美
人生珪陳才人生珙鄭才人生瑱武賢儀生璿第三十子璿餘七
子天母氏失傳

奉天皇帝琮景雲元年王許昌郡與真定王同封先天元年進王郟
與郢王同封開元四年領安西大都護安撫河東關內隴右諸蕃大
使十三年徙王庶與忠棣榮光儀潁永壽延盛濟十一王同封十
五年與十王並領節度不出閭琮以涼州都督兼河西諸軍節度
大使天寶元年改節河東十載薨贈太子諡靖德肅宗立詔曰靖

德太子琮親則朕兄睿哲聰明朕昔踐儲極顧誠非次君父有命不敢違永言懇讓不克如素宜進諡奉天皇帝妃實爲恭應皇后詔尚書右僕射裴冕持節改葬羣臣素服臨送達禮門帝御門哭以過喪墓號齊陵無子以太子瑛子休嗣王琮始名嗣直太子嗣謙棣王嗣真鄂王嗣初靖恭太子嗣玄開元十三年更名曰潭曰鴻曰洽曰消曰況後十年改今名

太子瑛始王真定進王郢開元三年立爲皇太子七年詔太子諸王入國學行齒胄禮太常擇日謁孔子太子獻詔右散騎常侍褚无量執經羣臣學官諸生以差賜帛明年瑛加元服見太廟十六年詔九品官息女可配太子者有司採閱待進止以太常少卿薛緇女爲妃帝種麥苑中瑛諸王侍登帝曰是將薦宗廟故親之亦欲若等知稼穡之難因分賜侍臣曰春秋書無麥禾古所甚重比詔使者閱田畝所對不以實故朕自時以觀其成云初瑛母以倡進善歌舞帝在路得幸及即位擢妃父元禮兄常奴皆至大官鄂

光二王母亦帝爲臨淄王時以色選及武惠妃寵幸傾後宮生壽
王愛與諸子絕等而太子二王以母失職頗怏怏惠妃女咸宜公
主婿楊洄揣妃旨伺太子短譁爲醜語惠妃訴于帝且泣帝大怒
召宰相議廢之中書令張九齡諫曰太子諸王日受聖訓天下共
慶陛下享國父子孫蕃衍柰何一日棄三子昔晉獻公惑嬖姬之
讒申生憂死國乃大亂漢武帝信江充巫蠱禍及太子京師喋血
晉惠帝有賢子賈后譖之乃至喪亡隋文帝聽后言廢太子勇遂
失天下今太子無過二王賢父子之道天性也雖有失尚當掩之惟
陛下裁赦帝默然太子得不廢俄而九齡罷李林甫專國數稱壽
王美以握妃意妃果德之二十五年洄復搆瑛瑤琚與妃之兄薛鏞
異謀惠妃使人詭召太子二王曰宮中有賊請介以入太子從之妃
白帝曰太子二王謀反甲而來帝使中人視之如言遽召宰相林
甫議答曰陛下家事非臣所宜豫帝意決乃詔太子瑛鄂王瑤光
王琚同惡均罪並廢爲庶人鏞賜死瑛瑤琚尋遇害天下冤之號

三庶人歲中惠妃數見庶人爲祟因大病夜召巫祈之請改葬且射行刑者瘞之訖不解妃死崇亡寶應元年詔贈瑛皇太子瑤等復王瑛子五人儼伸倩佖備瑛之廢帝使慶王畜儼等爲子儼封新平郡王伸平原郡王佖嗣慶王備太僕卿倩失傳

棣王琰開元二年始王郾與鄂鄆二王同封後徙王棣領太原牧太原以北諸軍節度大使天寶初爲武威郡都督經略節度河西隴右會妃韋以過置別室而二孺人爭寵不平求巫者密置符琰履中以求媚仇人告琰厭魅上帝伺其朝使人取履視之信帝怒責琰琰頓首謝曰臣罪宜死然臣與婦不相見二年有二孺人爭長臣恐此三人爲之及推果驗然帝猶疑琰怒未置太子以下皆爲請乃囚於鷹鷂狗坊以憂死妃縊之女無子還本宗琰凡五十五子得王者四人僖王汝南郡僑宜都俊濟南安順化僚太僕卿俠國子祭酒仁殿中監優祕書監寶應元年詔復琰王爵

鄂王瑤旣封遙領幽州都督河北節度使開元二十三年與榮

光儀穎永壽延盛濟信義十一王並授開府儀同三司實封二千戶詔詣東宮尚書省上日百官集送有司供張設樂是日悉拜王府官屬然未有府也而選任冒濫時不以爲榮

請恭太子琬始王酈徙王榮爲京兆牧領隴右節度大使又詔親巡按隴右選關內河東飛騎五萬防盛秋累兼單于安北大都護安祿山反詔琬爲征討元帥募河隴兵屯陝以高仙芝副之會薨琬風格秀整有素望中外倚之及薨莫不爲國悵恨詔加贈諡琬男女五十八人得王者三人俯王濟陰郡偕北平倩陳留偁衛尉卿

債秘書監佩鴻臚卿

光王琚開元十三年始王與儀穎永壽延盛濟七王同封俄領廣州都督勇力善騎射帝愛之與鄂王同居友睦甚皆篤學旣廢無嗣初琚名浚儀王濊穎王湮永王澤壽王清河延王迴盛王沐濟王溢信王沔義王灌陳王祉豐王澄恒王德涼王縱汴王滔至二十三年詔悉改今名

夏悼王一生韶秀以母寵故鍾愛命之曰一未免懷薨追爵及諡時帝在東都故葬龍門東岑宮中望見云

儀王璩既封授河南牧薨贈太傅子佻王鍾陵郡鍾廣陵

穎王璩喜讀書好文辭開元十五年遙領安東都護安祿山反詔領劍南節度大使以楊國忠爲之副帝西出令御史大夫魏方進爲置頓使移書劍南屬郡託璩之藩大設儲備璩先即鎮更以蜀郡長史崔圓爲副璩濟江舟中以綵席藉步命徹之曰此可寢柰何踐之璩之出遽不及受節司馬史貲請建大槩蒙油囊先驅以威道路璩笑曰既爲眞王矣安用假節爲將至成都崔圓迎拜馬前璩不爲禮圓銜之璩視事再踰月人便其寬圓奏罷居內宅乃詔宣慰肅宗於彭原從還京師建中四年薨年六十六子伸爲榮陽王僭高邑王覩楚國公傳夔國公

懷思王敏貌黜豸秀若圖畫帝愛之甫晬薨追爵及諡柩葬劔陵

永王璘少失母肅宗自養視之長聰敏好學貌陋甚不能正視既

封領荊州大都督安祿山反帝至扶風詔璘即日赴鎮俄又領山
南江西嶺南黔中四道節度使以少府監竇昭爲副璘至江陵募
士得數萬補署郎官御史時江淮租賦鉅億萬在所山委璘生官
中於事不通曉見富且強遂有闕江左意以薛鏐李臺卿韋子春
劉巨鱗蔡駒爲謀主肅宗聞之詔璘還覲上皇于蜀璘不從其子
襄城王陽剛鷲之謀亦樂亂勸璘取金陵即引舟師東下甲士五
千趨廣陵以渾惟明季廣琛高仙琦爲將然未敢顯言取江左也
會吳郡採訪使李希言平牒璘璘因發怒曰寡人上白于皇帝弟
地尊禮絕今希言乃平牒抗威落筆署字何邪乃使惟明襲希言
而令廣琛趨廣陵攻採訪使李成式璘至當塗希言已屯丹楊遣
將元景曜等拒戰不勝降於璘江淮震動明年肅宗遣官者啖廷
瑒等與成式謀招諭之時河北招討判官李銑在廣陵有兵千餘
廷瑒邀銑屯揚子成式又遣裴茂以廣陵卒三千戍伊婁埭張旗
幟大閱士璘與傷登陴望之有懼色廣琛知事不集謂諸將曰與

公等從王豈欲反邪上皇播遷道路不通而諸子無賢於王者如
摠江淮銳兵長驅雍洛大功可成今乃不然使吾等名絳叛逆如
後世何衆許諾遂割臂盟於是惟明奔江寧馮季康奔白沙廣琛
以兵六千奔廣陵璘使騎追躡之廣琛曰我德王故不忍決戰逃命
歸國耳若逼我且決死追者止乃免是夜銑陣江北夜然束草人
執二炬景亂水中覘者以倍告璘軍亦舉火應之璘疑王師已濟
攜兒女及麾下遁去遲明覺其給復入城具舟楫使傷驅衆趨晉
陵諜者告曰王走矣成式以兵進先鋒至新豐璘使傷仙琦逆擊
之銑合勢張左右翼射傷中肩軍遂敗仙琦與璘奔鄱陽司馬開
城拒璘怒焚城門入之收庫兵掠餘千將南走嶺外皇甫侁兵追
及之戰大庾嶺璘中矢被執侁殺之傷爲亂兵所害仙琦逃去璘
未敗時上皇下誥降爲庶人徙置房陵及死侁送妻子至蜀上皇
傷悼久之肅宗以少所自鞠不宣其罪謂左右曰皇甫侁執吾弟
不送之蜀而擅殺之何邪由是不復用薛鏐等皆伏誅子儼爲餘

姚王偵莒國公僕邨國公伶儀並國子祭酒

壽王瑁母惠妃類姪不育及瑁生寧王請養邨中元妃自乳之名爲己子故封比諸王最後開元十五年遙領益州大都督初帝以永王等尚幼詔不入謁瑁七歲請與諸兄衆謝拜舞有儀矩帝異之寧王薨請制服以報私恩詔可大曆十年薨贈太傅子王者三人優王德陽郡伉濟陽郡俱廣陽郡伉薛國公傑國子祭酒

延王玢母尚書右丞範之孫帝重其名家而玢亦仁愛有學旣封遙領安西大都護帝入蜀玢凡三十六子不忍棄故徐進數日見行在所帝奴心漢中王瑀申救得解聽歸靈武興元元年薨子倬王彭城郡伉平陽倂魯國公偃荆國公仇太僕卿

盛宣王琦旣封領揚州大都督帝之西詔爲廣陵大都督淮南江東河南節度大使以劉彙爲副李成式爲副大使琦不行廣德二年薨贈太傅子償封員定王佩武都王俗徐國公係許國公

濟王環逸其薨年子倬王永嘉郡伉平樂郡

信王瑄開元二十一年始王與義陳豐恒涼汴六王同封子修封
新安王侗晉陵王

義王珣與信王並失薨年子儀爲舞陽王僂高密王

陳王珪二十一子得王者三人倫王安南郡佗臨淮佻安陽

豐王珙已封爲左衛大將軍帝至普安授珙武威都督河西隴右
安西北庭節度大使以隴西太守鄧景山爲副珙不行廣德初吐蕃
入京師代宗幸陝將軍王懷忠閉苑門以五百騎劫諸王西迎虜
遇郭子儀懷忠曰上東遷宗社無主今僕奉諸王西奔以係天下
望公爲元帥惟所廢置子儀未對珙輒曰公何如司馬王延昌質
責珙曰上雖蒙塵未有失德王爲藩翰安得狂悖之言子儀亦讓
之即護送行在所帝赦不責珙語不遜羣臣恐其亂請除之乃賜
死子佻爲齊安王

恒王瑱好方士常服道士服從帝幸蜀還代宗時薨

涼王璿母高平王重規之女宮中號小武妃者璿薨代宗時子仇

爲瀘陽郡王

汴哀王璠於諸子爲最少初封纔數歲容貌秀澈有成人風帝愛之開元二十三年授右千牛衛大將軍明年薨唐制親王封戶八百增至千公主三百長公主止六百高宗時沛英豫三王太平公主武后所生戶始踰制垂拱中太平至千二百戶聖曆初相王太平皆三千壽春等五王各三百神龍初相王太平至五千衛王三千溫王二千壽春等王皆七百嗣雍衡陽臨淄巴陵中山王五百安樂公主二千長寧千五百宣城宣城安各千相王女爲縣主各三百相王增至七千安樂三千長寧二千五百宣城以下二千相王太平長寧安樂以七丁爲限雖水旱不蠲以國租庸滿之中宗遺詔雍壽春王進爲親王戶千開元後天子敦睦兄弟故寧王戶至五千五百岐薛五千申王以外家微戶四千邠王千八百帝妹戶千中宗諸女如之通以三丁爲限及皇子封王戶二千公主五百咸宜公主以母惠妃故封至千自是諸公主例千戶止初文德

皇后崩晉王最幼太宗憐之不使出閤豫王亦以武后少子不出
閤嗣聖初即帝位及降封相王乃出閤中宗時譙王失愛遷外藩
溫王年十七猶居宮中遂立爲帝開元後自王子幼多居禁內既長
詔附苑城爲大宮分院而處號十王宅所謂慶忠棣鄂榮光儀穎
永延盛濟等王以十舉全數也中人押之就夾城參天子起居家
令日進膳引詞學士入授書謂之侍讀壽信義陳豐恒涼七王
就封亦居十宅鄂光廢死忠王立爲太子慶棣繼薨唯榮儀十四
王居院而府幕列於外坊歲時通名起居既又諸孫多則於宅外
更置百孫院天子歲幸華清宮又置十王百孫院于宮側宮人每
院四百餘百孫院亦三四十人禁中置維城庫以給諸王月奉諸
孫納妃嫁女就十王宅太子不居宅宮處乘輿所幸別院太子親
王公主婚嫁並供帳於崇仁之禮院此承平制云

肅宗十四子章岌皇后生代宗皇帝官人孫生係張生倓王生
從陳婕妤生僅韋妃生間張美人生王使後官生榮裴昭儀生儂

段婕妤生倖崔妃生德張皇后生佖佗後宮生信

越王係生開元時玄宗末年悉王太子子故係王南陽郡帝即位
至德二載十二月進王趙與彭充徑鄆襄杞召興定九王同封乾
元二年九節度兵潰河北朝廷震駭乃以李光弼代郭子儀摠兵
關東而光弼請賢王爲帥於是詔係充天下兵馬元帥而光弼以
司空兼侍中薊國公副知節度行營事係留京師史思明陷洛陽
係請行不聽明年徙王越帝寢疾皇太子監國張皇后與中人李
輔國有隙因召太子入謂曰輔國典禁軍用事久四方詔令皆出
其口矯天子制逼徙聖皇天下側目今上疾彌留輔國常怏怏忌
吾與汝又程元振陰結黃門圖不軌若釋不誅禍不移頃太子泣
曰此二人者陛下勳舊而上體不裕重以此事得無震懼乎願出
外徐計之后曰是難與共事者乃召係曰汝能行此乎係許諾即
遣內謁者監段佖俊選材勇官者三百人授甲長生殿以帝命召
太子元振以告輔國乃相與勒兵凌宵門迎太子以難告太子曰

上疾亟吾可懼死不赴乎元振曰赴則及禍乃以兵護太子止飛龍殿勒兵夜入三殿收係及恒俊等百餘人繫之幽后別殿后及係皆為輔國所害係三子建王武威郡道興道通齊國公

承天皇帝俊始王建寧英毅有才略善騎射祿山亂典親兵扈車駕度渭百姓遮道留太子太子使喻曰至尊播遷吾可以達左右乎俊進說曰逆胡亂常四海崩分不因人情圖興復雖欲從上入蜀而散關以東非國家有夫大孝莫若安社稷殿下當募豪桀趣河西收牧馬今防邊屯士不下十萬而光弼子儀全軍在河朔與謀興復策之上者廣平王亦替之於是議定太子北過渭兵仗賙惡士氣崩沮日數十戰俊以驍騎數百從每接戰常身先血殷袂不告也太子或過時未食俊輒涕泗不自勝三軍皆屬目至靈武太子即帝位議以俊為天下兵馬元帥左右固請廣平王帝曰廣平既冢嗣安用元帥荅曰太子從曰撫軍守曰監國元帥撫軍也莫宜於廣平王帝從之更詔俊典親軍以李輔國為府司馬時張

良娣有寵與輔國交構欲以動皇嗣者倓忠蹇數為帝言由是為良娣輔國所譖妄曰倓恨不搃兵鬱鬱有異志帝惑偏語賜倓死俄悔悟明年廣平王收二京使李泌獻捷泌與帝雅素從容語倓事帝改容曰倓於艱難時實自有力為細人間閱欲害其兄我計社稷割愛而為之所泌曰爾時臣在河西知其詳廣平於兄弟篤睦至今言建寧則嗚咽不自已陛下此言得之讒口耳帝泣下曰事已爾未耐何泌曰陛下嘗聞黃臺瓜乎高宗有八子天后所生者四人自為行而睿宗最幼長曰弘為太子仁明孝友后方圖臨朝鳩殺之而立次子賢賢曰憂惕每侍上不敢有言乃作樂章使工歌之欲以感悟上及后其言曰種瓜黃臺下瓜熟子離離一摘使瓜好再摘令瓜稀三摘尚云可四摘抱蔓歸而賢終為后所斥死黔中陛下今一摘矣慎無再帝愕然曰公安得是言是時廣平有大功亦為后所構故泌因對及之廣平遂安及即位追贈倓齊王大曆三年有詔以倓當艱難時首定大謀排眾議於中興有功乃進謚承天

皇帝以興信公主季女張為恭順皇后真配焉葬順陵祔主奉天
皇帝廟同殿異室云初李泌請加贈倓代宗曰倓性忠孝而困於
讒追帝之若何答曰開元中上皇兄弟皆贈太子帝曰是特祖宗
友愛耳豈若倓有功乎於是追帝號遣使迎喪彭原既至城門
喪輜不動帝謂泌曰豈有恨邪卿往祭之以白朕意且卿及知倓艱
難定策者必為挽詞二解追述倓志命挽士唱泌因進酌輜乃行
觀者皆為垂泣

衛王佖始王西平又蓋寃寶應元年五月與鄆王同追封

彭王僅始王新城進封彭史思明陷河洛人心震駭羣臣請以諸
王臨統方鎮兵遥相維繫於是詔僅充河西節度充王北廷涇王
隴右杞王陝西興王鳳翔並為大使是歲僅薨子鎮為常山郡王
兗王儻始王潁川進王充寶應元年薨

涇王佺始王東陽進王涇興元元年薨

鄆王榮始王靈昌又蓋薨追封

襄王儂至德二載始王與杞召興定四王同封貞元七年薨子宣為伊吾郡王宋樂安王宣裔孫焜

焜性謹柔材無過人者光啓二年田令孜逼僖宗幸興元邠寧節度使朱玫以五千騎追乘輿不及焜以疾不能從玫劫之駐鳳翔得臺省官百餘乃脅宰相蕭遘等率羣臣盟石鼻驛奉焜為嗣襄王監軍國事因還京師即封拜官屬初遘執不可於是罷遘而玫自為侍中號令已出以裴澈為門下侍郎鄭昌圖中書侍郎皆平章事遣柳陟等十餘人分諭天下嗣襄王所以監國意皆得進官玫又脅太子太師裴璩等奉牋勸進焜五讓乃即位改元建貞尊僖宗為太上元皇聖帝河中節度使王重榮率諸藩貢奉歸者十八九而蔡州秦宗權自僭號惟太原李克用不從時帝遣使諭重榮克用故二人聽命樞密使楊復恭等傳檄三輔募能斬玫者以邠寧節度畀之其偽將王行瑜自鳳州入京師殺玫而焜與澈昌圖并官屬奔東渭橋重榮給使迎之焜與官屬別且泣曰朕見重榮

當令備所服迓公等至蒲執殺之因械澈等于獄誅殺僞官函焜首
至行在所焜即僞位凡九月敗始焜首至羣臣白帝御興元南門受
之百官稱賀太常博士殷盈孫奏言禮公族有罪有司曰某之罪
在大辟君曰赦之如是者三走出致刑焉君為素服不舉者三日今
焜皇族以不能固節迫脅至此宜廢為庶人絕屬籍葬以庶人禮大
捷之慶須朱玫首至乃賀詔可

杞王倓貞元十四年薨

召王僖元和元年薨

恭懿太子詔始封興王上元元年薨召生后方專愛帝最憐之后
數憾儲嫡欲以詔嗣會薨計塞是夕帝及后夢詔辭泣涕去
帝鯁悵故冊贈皇太子

定王侗寶應初薨

代宗二十子睿真皇后生德宗皇帝崔妃生邈貞懿皇后生迥十
七王史亡其母之氏位

昭靖太子邈好學以賢聞上元二年始王益昌帝即位寶應元年進王鄭與韓王同封淄青牙將李懷玉逐其帥侯希逸詔邈為平盧淄青節度大使以懷玉知留後大曆初代皇太子為天下兵馬元帥八年薨遂罷元帥府

均王遐早薨貞元八年追封

睦王述大曆十年田承嗣不臣而昭靖天無疆王帝乃悉王諸子領諸鎮軍威天下於是述為睦王領嶺南節度逾柳王渭北鄜坊節度迴韓王汴宋節度造忻王昭義節度皆為大使連為恩王遘鄜王暹韶王遇端王通循王通恭王遠原王逸雅王並開府儀同三司然不出閣德宗建中初周天下訪太后所在述於諸王最長故拜奉迎太后使以工部尚書喬琳副之貞元七年薨丹王逾始王郴建中四年與簡王同徙封元和十五年薨

恩王連元和十二年薨

韓王迥始王延慶郡以母寵故與鄭王先徙封貞元十二年薨

簡王遘始王鄜徙封簡元和四年薨

益王迺大曆十四年始王亡薨年

隋王迅興元元年薨

荆王選蚤薨建中二年追王

蜀王遡本名遂大曆十四年始王建中二年改今名

忻王造元和六年薨

韶王暹貞元十二年薨

嘉王運貞元十七年薨

端王遇貞元七年薨

循王遙亡薨年

恭王通亡薨年

原王達大和六年薨

雅王逸貞元十五年薨

德宗十一子昭德皇后生順宗皇帝帝取昭靖太子子諡為第一

子又取順宗子源為第六子餘八王史亡其母之氏位

舒王誼初名謨帝愛其幼取為子大曆十四年始王舒與通虔肅
資四王同封拜開府儀同三司詔有司給奉稍俄以軍興罷謨於
諸王最長帝欲試以事故拜涇原節度大使時尚父郭子儀病篤
帝臨軒遣謨持詔往視謨冠遠游冠御絳袍乘象輅四馬飛龍士
三百國府官皆袴褶以從子儀手叩頭謝恩謨宣詔已乃易服勞
問還於是李希烈反招討使李勉戰不勝奔宋州朝廷大震乃拜
謨揚州大都督荆襄江西沔鄂節度使諸軍行營兵馬都元帥改
名誼軍中以哥舒翰由元帥敗而王所封同之帝乃使徙王普以
兵部侍郎蕭復為統軍長史湖南觀察使孔巢父為行軍左司馬
山南東道節度行軍司馬樊澤為右刑部員外郎劉從一侍御史
韋儼為判官兵部員外郎高參掌書記右金吾大將軍渾瑊為中
軍虞候江西節度使嗣曹王臯為前軍兵馬使鄂岳團練使李兼
副之山南東道節度使賈耽為中軍兵馬使荆南節度使張伯儀

為後軍兵馬使左神武軍使王价左衛將軍高承謙檢校太子詹事郭曙檢校右庶子常愿為押衙未及行涇原兵反詎從帝出奉天朱泚攻城詎晝夜傳勞諸軍不解帶帝還京師復故封揚州大都督如故永貞元年薨

通王諶始王拜開府儀同三司貞元九年領宣武節度大使以李萬榮為留後二年徙河東以李說為留後皆不出閤

虔王諒以王拜開府儀同三司貞元二年領蔡州節度大使以吳少誠為留後十年徙節朔方靈鹽以李樂為留後明年領橫海又徙徐州以程懷信張愔為留後不出閤

肅王詳資秀異帝惡之建中二年薨甫四歲帝欲用浮屠說塔而不墳禮儀判官李峒諫非禮乃止詔贈揚州大都督

文敬太子諒見愛於帝命為子貞元初先諸王王邕歷義武昭義二軍節度大使以張茂昭王虔休為留後不出閤十五年薨年十八追贈及諡葬日羣臣以位而哭通化門外陵及廟置令丞云

資王謙亡薨年

代王謹始王縉雲郡蚤薨建中二年追王

昭王誠貞元二十一年始王亡薨年

欽王諤順宗即位與珍王同封亡薨年

珍王誠大和六年薨

順宗二十七子莊憲皇后生憲宗皇帝及綰張昭訓生經趙昭儀
生結王昭儀生總約緝餘二十王史亡母之氏位四王蚤薨亡官諡
鄭王經本名渙貞元四年始王建康郡與廣陵洋川臨淮弘曲辰漢
東晉陵高平靈安宣城德陽河東洛交十二王同封二十一年又
與均淑莒密郿邵宋集翼和衡欽會珍福撫岳棗桂翼二十五皆
進王王二十九年大和八年薨

均王緯初名沔王洋川後進王王二十三年開成二年薨

淑王縱初名洵王臨淮後進王王三十二年開成元年薨

莒王紆初名浼為秘書監王弘農後進王王二十九年大和八年薨

密王綱初名泳王漢東後進王王三年元和二年薨

郇王總初名湜授少府監王晉陵後進王王四年元和三年薨

邵王約初名淑為國子祭酒王高平進王王二年元和元年薨

宋王結初名滋王雲安進王王十八年長慶二年薨

集王緝初名淮王宣城進王王十八年長慶二年薨

冀王綽初名濟為太常卿王德陽進王王三十年大和九年薨

和王綺初名滉王河東進王王二十八年大和七年薨

衡王絢王二十二年寶曆二年薨

會王纁王六年元和五年薨

福王綰歷魏博節度大使咸通元年進拜司空王五十七年咸通

二年薨

珍王繕初名況王洛交後進王亡薨年

撫王紘咸通初歷司空又進司徒太尉王七十三年乾符三年薨

岳王緄王二十三年大和二年薨

秦王紳王五十六年咸通元年薨

桂王綸王十年元和九年薨

翼王綽王五十八年咸通三年薨

蘄王緝王六年咸通八年薨

欽王績亡薨年

憲宗二十子紀美人生寧懿安皇后生穆宗皇帝孝明皇后生宣宗皇帝餘十七王皆後宮所生史逸其母之號氏

惠昭太子寧貞元二十一年始王平原與同安彭城高密文安四王同封帝即位進王鄧與澧深洋絳四王同封於是國嗣未立李絳等建言聖人以天下爲大器知一人不可獨化四海不可無本故建太子以自副然後人心定宗祏安有國不易之常道陛下受命四年而冢子未建是開窺覲之端乖慎重之義非所以承列聖示萬世帝曰善以寧爲皇太子更名宙前以制示絳等未幾復初名冊禮用孟夏雨不克改用孟秋亦雨冬十月克行禮明年薨年

禮王暉始王同安後進王惠昭之喪吐突承璀議復立儲副意屬
暉帝自以穆宗為太子帝崩之夕承璀死王被殺秘不發喪久之
以告廢朝三日三子曰漢王東陽郡曰源安陸曰演臨安初暉名
寬深王察洋王寰絳王寮建王審元和七年並改今名

深王棕始王彭城郡進王深子潭王河內叔吳興洋王忻始王高
密進王洋大和二年薨子沛王穎川郡

絳王悟始王文安進王敬宗崩蘇佐明等矯詔以王領軍國事王
守澄等立文宗王見殺二子洙王新安滂高平

建王恪元和元年始封時淄青節度使李師古死其弟師道丐符
節故詔恪為鄆州大都督平盧軍淄青等州節度大使以師道為

留後然不出閣長慶元年薨無嗣

鄜王憬長慶元年始王與瓊沔婺茂淄衢澶七王同封開成四年
薨子溥平陽郡王

瓊王悅子津河間郡王

沔王恂子瀛晉陵郡王

婺王擇子清新平郡王

茂王愔子德武功郡王

淄王協開成元年薨子濬許昌郡王渙馮翊郡王

衡王澹子涉晉平郡王

澶王悅子寧鴈門郡王

棣王惲大中六年始王與彭信二王同封咸通三年薨無嗣

彭王揚乾寧中韓建殺之石隄谷無嗣

信王擘咸通八年薨無嗣

榮王愐咸通三年始王廣明初拜司空子令平嗣王凡八王史失

其薨年

穆宗五子恭僖皇后生敬宗皇帝貞獻皇后生文宗皇帝宣懿皇

后生武宗皇帝餘二王亡其母之氏位

懷懿太子湊少雅裕有尋矩長慶元年始王漳與安王同封文宗
即位疾王守澄顯很引支黨撓國謀盡誅之密引宰相宋申錫
使爲計守澄客鄭注伺知之以告乃謀先事殺申錫又以王賢有
中外望因欲株聯大臣族夷之乃令神策虞候豆盧著上飛變且
言宮史晏劾則朱訓與申錫昵吏王師文圖不軌訓嘗言上多疾
太子幼若兄終弟及必漳王立申錫陰以金幣進王而王亦以珍
服厚荅即捕訓等繫神策獄榜掠定其辭諫官羣伏閣極言出獄
牒付外雜治注等懼事洩乃請下詔貶王帝未之悟因黜湊爲巢
縣公時大和五年也命中人持詔即賜且慰曰國法當爾無它憂
八年薨贈齊王注後以罪誅帝哀湊被讒死不自明開成二年追贈
安王溶初楊賢妃得寵於文宗晚稍多疾妃陰請以王爲嗣密爲
自安地帝與宰相李珣謀珣謂不可乃止及帝崩仇士良立武宗
欲重己功即擿溶嘗欲以爲太子事殺之
敬宗五子妃郭氏生普餘四王亡母之氏位

悼懷太子普姿性韶悟寶曆元年始王晉文宗愛之若己子嘗欲
爲嗣大和二年薨帝惻念不能已故贈卹加焉敬宗第二子休復
文宗開成二年封梁王第三子執中爲襄王第四子言揚爲紀王
第五子成美爲陳王執中子寀爲樂平郡王

陳王成美初文宗以莊恪薨大臣數請建東宮開成四年帝乃立
成美爲皇太子典冊未具而帝崩仇士良立武宗殺之於邸子儼
王宣城郡文宗二子王德妃生永後宮生宗儉

莊恪太子永大和四年始王魯帝以王幼宜得賢輔因召見傅和
元亮元亮以卒史進有所問不能荅帝責謂宰相王可教官屬
應任士大夫賢者寧元亮比邪於是劇選戶部侍郎庾劼休兼王
傅太常卿鄭肅兼長史戶部郎中李踐方兼司馬六年遂立爲皇
太子帝承寶曆茶怠身勤儉率天下謂晉王生謹敏欲引爲嗣會
蚤天故久不議東宮事及太子立天下屬心焉開成三年詔宮臣
詣崇明門謁朔望侍讀偶日入對太子稍事燕豫不能壹循法保

傳戒告愁不納又母愛弛揚賢妃方幸數譖之帝它日震怒御延英引見羣臣詔曰太子多過失不可屬天下其議廢之羣臣頓首言太子春秋盛雖有過尚可改且天下本不可輕動惟陛下幸赦御史中丞狄兼謩言流涕固爭帝未決罷羣臣又連章論救意稍釋詔太子還少陽院以中人護視誅倖昵數十人敕侍讀竇崇直周敬復詣院授經然太子終不能自白其讒而行已亦不加脩也是年暴薨帝悔之明年下詔以陳王爲太子置酒殿中有俳兒緣橦父畏其顛環走橦下帝感動謂左右曰朕有天下返不能全一兒乎因泣下即取坊工劉楚才等數人付京兆榜殺之及禁中女倡十人斃永巷皆短毀太子者宰相楊嗣復等不及知因言楚才等罪當誅京兆殺之不覆奏敢以請翌日詔京兆後有決死敕不覆者亦許如故事以聞

蔣王宗儉開成二年始王亡薨年

武宗五子其母氏位皆不傳

杞王峻開成五年始王

益王峴會昌二年始王與兗德昌三王同封

兗王岐

德王嶧

昌王嵯並逸其薨死年

宣宗十一子元昭太后生懿宗皇帝餘皆亡其母之氏位

靖懷太子湊會昌六年始王雍與夔慶二王同封大中六年薨有

詔追冊

雅王涇大中元年始王亡薨死年

通王滋會昌六年始王夔與慶王沂同封帝初詔鄆王居十六宅

餘五王處大明宮內院以諫議大夫鄭漳兵部郎中李鄴為侍

讀五日一謁乾符門為王授經鄆王立為懿宗乃罷滋徙王昭

宗乾寧三年領侍衛諸軍是時誅王行瑜而李茂貞怨以兵入

觀詔滋與諸王分統安聖奉宸保寧安化軍衛京師天子將狩太

原韓建道迎之留次華州建畏王等有兵遣人上急變告諸王欲殺建脅帝幸河中帝驚召建諭之稱疾不肯入救滋與睦王濟王韶王彭王韓王沂王陳王謁建自解建留軍中奏言中外異體臣不可以私見又言晉八王擅權卒敗天下請歸十六宅悉罷所領兵帝不許建以兵環行在請誅大將李筠帝懼斬筠以謝建盡逐衛兵自是天子孤弱矣初帝使嗣延王戒丕嗣丹王允往見李克用二王還建惡之又嗣覃王嘗督軍伐茂貞於是劾奏比歲兵纏近輔諸王階其禍使乘輿越在下藩不得安臣已請解其兵今延覃丹三王尚陰計以危國請誅之帝曰渠至是邪後三日與劉季述矯詔以兵攻十六宅諸王被髮乘垣走或升屋極號曰帝救我建乃將十一王并其屬至石隄谷殺之徐以謀反聞天下寃之濟韶彭韓沂陳延覃丹九王史逸其系胄云

慶王沂大中十四年薨

濮王澤大中二年始王亡薨年

鄂王潤大中五年始王乾符三年薨

懷王洽大中八年與昭康二王同封亡薨年

昭王訥乾符三年薨

康王汶乾符四年薨

廣王灑大中十一年始王與衛王同封乾符四年薨

衛王灌大中十四年薨

懿宗八子惠安皇后生僖宗皇帝恭憲皇后生昭宗皇帝餘六王
亡其母氏位

魏王侑咸通三年始王與涼蜀二王同封

涼王侹乾符六年薨

蜀王佶

威王侃咸通六年始王郢十年徙王

吉王保咸通十三年始王與睦王同封王於兄弟為最賢始僖宗

崩王最長將立之楊復恭獨議以昭宗嗣乾寧元年李茂貞等以

兵入京師謀廢帝立王會季克用以兵逐行瑜乃止
恭哀太子倚初封睦王為劉季述所殺天復初追贈

僖宗二子史失其母氏位

建王震中和元年始王

益王陞光啓三年始王並亡並元年

昭宗十七子積善皇太后生裕及哀皇帝餘皆失母之氏位

德王裕大順二年始王帝幸華州韓建已奪諸王兵不自安乃請

王皇子之未王者既又殺諸王因請立裕為皇太子釋言於四方

時乾寧四年也劉季述等幽帝東內奉裕即皇帝位季述誅裕匿

右軍或請殺之帝曰太子冲孺賊彊立之且何罪詔還少陽院復為

王朱全忠自鳳翔還見王春秋盛標字軒秀忌之密語崔胤曰王

既竊帝矣大義滅親渠可留公任宰相盍啓之胤從容言如全忠

意帝不許他日以語全忠全忠曰此國大事臣安敢與此必胤賣

臣也乃免帝遷洛它日謂蔣玄暉曰德王朕愛子全忠柰何欲殺

之言已泣下自齧指流血立暈即擿語全忠全憲帝被弑立暈
置酒邀諸王九曲池飲酣皆殺之投尸水中

棣王祁乾寧元年始王與虔沂遂三王同封

虔王禊

沂王禊

遂王禕

景王祕乾寧四年始王與祁王同封

祁王祺

雅王禎光化元年始王與瓊王同封

瓊王祥

端王禎天祐元年始王與豐和登嘉四王同封

豐王祁

和王福

登王禧

嘉王祐

穎王禔天祐二年始王與蔡宗王祐同封

蔡王祐

贊曰唐自中葉宗室子孫多在京師幼者或不出閣雖以國王之
實與匹夫不異故無赫赫過惡亦不能為王室軒輊運極不還與
唐俱殫然則曆數短長自有底止彼漢七國晉八王不得其效愈
速禍云

十一宗諸子列傳第七



諸公主列傳第八

端明殿學士兼翰林侍讀學士龍圖閣直學士
勅撰

世祖一女

同安公主高祖同母媼也下嫁隋州刺史王裕貞觀時以屬尊進大長公主嘗有疾太宗躬省視賜縑五百姆侍皆有賚子永徽初賜實戶三百薨年八十六裕隋司徒柬之子終開府儀同三司

高祖十九女

長沙公主下嫁馮少師

襄陽公主下嫁竇誕

平陽昭公主太穆皇后所生下嫁柴紹初高祖兵興主居長安紹曰尊公將以兵清京師我欲往恐不能借奈何主曰公行矣我自爲計紹詭道走并州主奔鄠發家貲招南山亡命得數百人以應帝於是名賊何潘仁壁司竹園殺行人稱摠管主遣家奴馬三寶

唐書列傳八
喻降之共攻鄆別部賊李仲文向善志丘師利等各持所領會戲
下因略地盤屋武功始平下之乃申法誓衆禁剽奪遠近咸附勒
兵七萬威振關中帝度河紹以數百騎並南山來迎主引精兵萬
人與秦王會渭北紹及主對置幕府分定京師號娘子軍帝即位
以功給賚不涯武德六年薨葬加前後部羽葆鼓吹大路麾幢虎
賁甲卒班劍太常議婦人葬古無鼓吹帝不從曰鼓吹軍樂也往
者主身執金鼓參佐命于古有邪宜用之

高密公主下嫁長孫孝政又嫁段綸綸隋兵部尚書文振子爲工
部尚書杞國公永徽六年主薨遺命吾葬必令墓東向以望獻陵
冀不忘孝也

長廣公主始封桂陽下嫁趙慈景慈景隴西人帝美其姿制故妻
之帝起兵或勸亡去對曰母以我爲命且安往吏捕繫于獄帝平
京師引拜開化郡公爲相國府文學進兵部侍郎爲華州刺史討
堯君素戰死贈秦州刺史諡曰忠公主更嫁楊師道聰悟有思工

爲詩豪侈自肆晚稍折節以壽薨

長沙公主始封萬春下嫁豆盧覽子懷讓

房陵公主始封永嘉下嫁竇奉節又嫁賀蘭僧伽

九江公主下嫁執失思力

廬陵公主下嫁喬師望爲同州刺史

南昌公主下嫁蘇勗

安平公主下嫁楊思勗

淮南公主下嫁封道言

真定公主下嫁崔恭禮

衡陽公主下嫁阿史那社尒

丹陽公主下嫁薛萬徹萬徹恚甚公主羞不與同席者數月太

宗聞笑焉爲置酒悉召它婿與萬徹從容語握槊賭所佩刀陽不

勝遂解賜之主喜命同載以歸

臨海公主下嫁裴律師

館陶公主下嫁崔宣慶

安定公主始封千金下嫁温挺挺死又嫁鄭敬玄

常樂公主下嫁趙瓌生女爲周王妃武后殺之逐瓌括州刺史徙壽州越王貞將舉兵遺瓌書假道瓌將應之主進使者曰爲我謝王與其進不與其退若諸王皆丈夫不應淹久至是我聞楊氏篡周尉遲迥乃周出猶能連突厥使天下響震况諸王國懿親宗柘所託不捨生取義尚何須邪人臣同國患爲忠不同爲逆王等勉之王敗周興効瓌與主連謀皆被殺

太宗二十一女

襄城公主下嫁蕭銑性孝睦動循矩法帝敕諸公主視爲師式有司告營別第辭曰婦事舅姑如父母異宮則定省闕止昔故第門列雙戟而已銑卒更嫁姜簡永徽二年薨高宗舉哀於命婦朝堂遣工部侍郎立行淹馳駟弔祭陪葬昭陵喪次故城帝登樓望哭以送柩

汝南公主蚤薨

南平公主下嫁王劭直以累斤嶺南更嫁劉玄意

遂安公主下嫁竇逵逵死又嫁王大禮

長樂公主下嫁長孫沖帝以長孫皇后所生故敕有司裝賈視長公主而倍之魏徵曰昔漢明帝封諸王曰朕子安得同先帝子乎然則長公主者尊公主矣制有等差渠可越也帝以語后后曰嘗聞陛下厚禮徵而未知也今聞其言乃納主於義社稷臣也妾於陛下夫婦之重有所言猶候顏色况臣下情隔禮殊而敢犯嚴顏陳忠言哉願許之與天下為公帝大悅因請齎帛四百匹錢四十萬即徵家賜之

豫章公主下嫁唐義識

比景公主始封巴陵下嫁柴令武坐與房遺愛謀反同主賜死顯慶中追贈立廟於墓四時祭以少牢

普安公主下嫁史仁表

東陽公主下嫁高履行高宗即位進為大長公主韋正矩之誅主坐婚家斥徙集州又坐章懷太子累奪邑封以長孫无忌舅族也故武后惡之垂拱中并二子徙置巫州

臨川公主韋貴妃所生下嫁周道務主工籀隸能屬文高宗立上孝德頌帝下詔褒答永徽初進長公主恩賞卓異永淳初薨道務殿中大監譙郡公範之子初道務孺祿時以功臣子養宮中範卒還第毀瘠如成人復內之年十四乃得出歷營州都督檢校右驍衛將軍諡曰襄

清河公主名敬字德賢下嫁程懷亮薨麟德時陪葬昭陵懷亮知節子也終寧遠將軍

蘭陵公主名淑字麗貞下嫁竇懷慈薨顯慶時懷慈官兗州都督太穆皇后之族子

晉安公主下嫁韋思安又嫁楊仁輅

安康公主下嫁獨孤諶

新興公主下嫁長孫曠

城陽公主下嫁杜荷坐太子承乾事誅又嫁薛瓘初主之婚帝使卜之繇曰二火皆食始同榮末同戚請晝昏則吉馬周諫曰朝謁以朝思相戒也講習以晝思相成也燕飲以晝思相歡也婚合以夜思相親也故上下有成內外有親動息有時吉凶有儀今先亂其始不可爲也夫卜所以決疑若黷禮慢先聖人所不用帝乃止麟德初瓘歷左奉宸衛將軍主坐巫蠱斥瓘房州刺史主從之官咸亨中主薨而瓘卒雙柩還京師子顓封河東縣侯濟州刺史琅邪王冲起兵顓與弟紹以所部庸調作兵募士且應之冲敗殺都吏以滅口事泄下獄俱死

合浦公主始封高陽下嫁房玄齡子遺愛主帝所愛故禮異它婿主負所愛而驕房遺直以嫡當拜銀青光祿大夫讓弟遺愛帝不許玄齡卒主導遺愛異貲既而反譖之遺直自言帝痛讓主乃免自是稍疏外主怏怏會御史劾盜得浮屠辯機金寶神枕自言主

所賜初浮屠廬主之封地會主與遺愛獵見而悅之具帳其廬與之亂更以二女子從遺愛私餉億計至是浮屠殊死殺奴婢十餘主益望帝崩無哀容又浮屠智勛迎占禍福惠弘能視鬼道士李晃高醫皆私侍主主使掖廷令陳玄運伺宮省機祥步星次永徽中與遺愛謀反賜死顯慶時追贈

金山公主蚤薨

晉陽公主字明達幼字兕子文德皇后所生未嘗見喜愠色帝有所怒責必伺顏徐徐辯解故省中多蒙其惠莫不與言愛后崩時主始孩不之識及五歲經后所游地哀不自勝帝諸子唯晉王及主最少故親畜之王每出閣主送至虔化門泣而別王勝衣班于朝主泣曰兄今與羣臣同列不得在內乎帝亦爲流涕主臨帝飛白書下不能辨薨年十二帝閱三旬不常膳日數十哀因以癯羸羣臣進勉帝曰朕渠不知悲愛無益而不能已我亦不知其所以然因詔有司簿主湯沐餘貲營佛祠墓側

常山公主未及下嫁薨顯慶時

新城公主晉陽母弟也下嫁長孫詮詮以罪徙雋州更嫁韋正矩為奉冕大夫遇主不以禮儀而主暴薨高宗詔三司雜治正矩不能辯伏誅以皇后禮葬昭陵旁

高宗三女

義陽公主蕭淑妃所生下嫁權毅

高安公主義陽母弟也始封宣城下嫁潁州刺史王勗天授中勗為武后所誅神龍初進冊長公主實封千戶開府置官屬睿宗立增戶千薨開元時玄宗哭於暉政門遣大鴻臚持節赴甲京北尹攝鴻臚護喪事

太平公主則天皇后所生后愛之傾諸女榮國夫人死后丐主為道士以幸冥福儀鳳中吐蕃請主下嫁后不欲弃之夷乃真築宮如方士薰戒以拒和親事久之主衣紫袞玉帶折上巾具紛礪歌舞帝前帝及后大咲曰兒不為武官何遽尔主曰以賜駙馬可乎

帝識其意擇薛紹尚之假萬年縣爲婚館門隘不能容翟車有司
毀垣以入自興安門設燎相屬道樾爲枯紹死更嫁武承嗣會承嗣
小疾罷昏后殺武攸暨妻以配主主方頷廣頤多陰謀后常謂類
我而主內與謀外檢畏終后世無它訾永淳之前親王食實戶八
百增至千輒止公主不過三百而主獨加戶五十及聖曆時進及
三千戶預誅二張功增號鎮國與相王均封五千而薛武二家女
皆食實封主與相王衛王成王長寧安樂二公主給衛士環第十
步一區持兵呵衛僭肖宮省神龍時與長寧安樂宜城新都定安
金城凡七公主皆開府置官屬視親王安樂戶至三千長寧二千
五百府不置長史宜城定安非韋后所生尸止二千主三子崇簡
崇敏崇行皆拜三品韋后上官昭容用事自以謀出主下遠甚憚
之主亦自以軋而可勝故益橫於是推進天下士謂儒者多寔狹
厚持金帛謝之以動大議遠近翕然嚮之玄宗將誅韋氏主與秘
計遣子崇簡從事定將立相王未有以發其端者主顧温王乃兒

子可劫以爲功乃入見王曰天下事歸相王此非兒所坐乃掖王
下取乘輿服進睿宗睿宗即位主權由此震天下加實封至萬戶
三子封王餘皆祭酒九卿主母奏事漏數徙乃得退所言皆從有
所論薦或自寒穴躡進至侍從旋踵將相朝廷大政事非關決不
下閒不朝則宰相就第咨判天子殆畫可而已主侍武后久善策
人主微指先事逢合無不中田園偏近甸皆上腴吳蜀嶺嶠市作
器用州縣護送道相望也天下珍滋譎怪充于家供帳聲伎與天
子等侍兒曳紈縠者數百奴伯嫗監千人隴右牧馬至萬匹長安
浮屠慧範畜貲千萬諧結權近本善張易之及易之誅或言其豫
謀者於是封上庸郡公月給奉稍主乳媪與通奏擢三品御史大
夫御史魏傳弓劾其姦賊四十萬請論死中宗欲赦之進曰刑賞
國大事陛下賞已妄加矣又欲廢刑天下其謂何帝不得已削銀
青階大夫薛謙光劾慧範不法不可貸主爲申理故謙光等反
得罪玄宗以太子監國使宋王岐王摠禁兵主恚權分乘輦至光

範門召宰相白廢太子於是宋璟姚元之不悅請出主東都帝不許
詔主居蒲州主大望太子懼奏斥璟元之以銷戢怨嫌監察御史
慕容珣復劾慧範事帝疑珣離間骨肉貶密州司馬主居外四月
太子表追還京師時宰相七人五出主門下又左羽林大將軍常元
楷知羽林軍李慈皆私謁主主內忌太子明又宰相皆其黨乃有
逆謀先天二年與尚書左僕射竇懷貞侍中岑羲中書令蕭至忠
崔湜太子少保薛稷雍州長史李益右散騎常侍昭文館學士賈
膺福鴻臚卿唐晔及元楷慈慧範等謀廢太子使元楷慈舉羽林
兵入武德殿殺太子懷貞羲至忠舉兵南衙為應既有日矣太子
得其姦召岐王薛王兵部尚書郭元振將軍王毛仲殿中少監姜
皎中書侍郎王琚吏部侍郎崔日用定策前一日因毛仲取內閑
馬三百率太僕少卿李令問王守一內侍高力士果毅李守德叩
虔化門梟元楷慈於北闕下縛膺福內客省執羲至忠至朝堂斬
之因大赦天下主聞變亡入南山三日乃出賜死于第諸子及黨

與死者數十人簿其田貲環瑤若山督子貸凡三年不能盡崇簡素知主謀苦諫主怒榜掠尤楚至是復官爵賜氏李始主作觀池樂游原以爲盛集旣敗賜寧申岐薛四王都人歲被禊其地

中宗八女

新都公主下嫁武延暉

宜城公主始封義安郡主下嫁裴巽巽有嬖姝主恚眚耳劓鼻且斷巽髮帝怒斥爲縣主巽左遷久之復故封神龍元年與長寧新寧義安安樂新平五郡主皆進封

定安公主始封新寧郡下嫁王同皎同皎得罪神龍時又嫁韋濯濯即韋皇后從祖弟以衛尉少卿誅更嫁太府卿崔銑主薨王同皎子請與父合葬給事中夏侯銛曰主義絕王廟恩成崔室逝者有知同皎將拒諸泉銑或訴於帝乃止銛坐是貶瀘州都督

長寧公主韋庶人所生下嫁楊慎交造第東都使楊務廉營摠第成府財幾竭乃擢務廉將作大匠又取西京高士廉第左金吾衛故

營合爲宅右屬都城左頰大道作三重樓以馮觀築山浚池帝及后數
臨幸置酒賦詩又并坊西隙地廣鞠場東都廢永昌縣主丐其治爲
府以地瀕洛築鄣之崇臺蜚觀相聯屬無慮費二十萬魏王泰故第
東西盡二坊渚沼三百畝泰薨以與民至是主丐得之亭閣華詭埒
西京內倚母愛寵傾一朝與安樂亘城二主后媚邠國崇國夫人爭任
事賊謁紛紜東都第成不及居韋氏敗斥慎交絳州別駕主借往
乃請以東都第爲景雲祠而西京第評木石直爲錢二十億萬
開元十六年慎交死主更嫁蘇彥伯務廉卒坐賊數十萬廢終身
永壽公主下嫁韋鐵蚤薨長安初追贈

永泰公主以郡主下嫁武延基大足中忤張易之爲武后所殺帝
追贈以禮改葬號墓爲陵

安樂公主最幼女帝遷房陵而主生解衣以祿之名曰裏兒姝秀
辯敏后尤愛之下嫁武崇訓帝復位光艷動天下侯王柄臣多出其
門嘗作詔箝其前請帝署可帝笑從之又請爲皇太女左僕射魏

元忠諫不可主曰元忠山東木強烏足論國事阿武子尚爲天子
天子女有不可乎與太平等七公主皆開府而主府官屬尤濫皆
出屠販納訾售官降墨敕斜封授之故號斜封官主營第及安樂
佛廬皆憲寫宮省而工緻過之嘗請昆明池爲私沼帝曰先帝未
有以與人者主不悅自鑿定昆池延袤數里足言可抗訂之也司農
卿趙履温爲繕治累石肖華山墜約橫邪回淵九折以石澆水又爲
寶鑪鑊怪獸神禽間以琛貝珊瑚不可涯計崇訓死主素與武延
秀亂即嫁之是日假后車輅自宮送至第帝與后爲御安福門臨
觀詔雍州長史竇懷貞爲禮會使弘文學士爲儂相王障車捐賜
金帛不貲翌日大會羣臣太極殿主被翠服出嚮天子再拜南面
拜公卿公卿皆伏地稽首武攸暨與太平公主偶舞爲帝壽賜羣
臣帛數十萬帝御承天門大赦因賜民酺三日內外官賜勳緣禮官
屬兼階爵奪臨川長公主宅以爲第帝徹民廬苑聲器然第成禁
藏空殫假萬騎仗內音樂送主還第天子親幸宴近臣崇訓子方

數歲拜太常卿封錫國公實封戶五百公主滿孺月帝后復幸第
大赦天下時主與長寧定安三家廝臺掠民子女爲奴婢左臺侍御
史袁從一縛送獄主入訴帝爲手詔喻免從一日陛下納主訴縱
奴騶掠平民何以治天下臣知放奴則免禍劾奴則得罪於主然
不忍屈陛下法自偷生也不納臨淄王誅庶人主方覽鏡作眉聞亂
走至右延明門兵及斬其首追貶爲悖逆庶人睿宗即位詔以二品
禮葬之趙履溫諂事主嘗褫朝服以項挽車庶人死蹈舞承天門
呼萬歲臨淄王斬之父子同刑百姓疾其興役割取肉去

成安公主字季姜始封新平下嫁韋捷捷以韋后從子誅主後薨

睿宗十一女

壽昌公主下嫁崔真

安興昭懷公主蚤薨

荆山公主下嫁薛伯陽

淮陽公主下嫁王承慶

代國公主名華字華婉劉皇后所生下嫁鄭萬鈞

涼國公主字華莊始封仙源下嫁薛伯陽

薛國公主始封清陽下嫁王守一守一誅更嫁裴巽

鄆國公主崔貴妃所生三歲而妃薨哭泣不食三日如成人始封

荆山下嫁薛儻又嫁鄭孝義開元初封邑至千四百戶

金仙公主始封西城縣主景雲初進封太極元年與玉真公主皆

為道士築觀京師以方士史崇玄為師崇玄本寒人事太平公主

得出入禁中拜鴻臚卿聲勢光重觀始興詔崇玄護作日萬人羣

浮屠疾之以錢數十萬賂狂人段謙冒入承天門升太極殿自稱

天子有司執之辭曰崇玄使我來詔涑嶺南且敕浮屠方士無兩

競太平敗崇玄伏誅

玉真公主字持盈始封崇昌縣主俄進號上清玄都大洞三景師

天寶三載上言曰先帝許妾捨家今仍叨主第食租賦誠願去公

主號罷邑司歸之王府玄亦不許又言妾高宗之孫睿宗之女陛

下之女弟於天下不為賤何必名繫主號資湯沐然後為貴請入
數百家之產延十年之命帝知至意乃許之薨寶應時
霍國公主下嫁裴虛己

玄宗二十九女

永穆公主下嫁王繇

常芬公主下嫁張去奢

孝昌公主蚤薨

唐昌公主下嫁薛鏞

靈昌公主蚤薨

常山公主下嫁薛譚又嫁靈真澤

萬安公主天寶時為道士開元新制長公主封戶二千帝妹戶千
率以三丁為限皇子王戶二千主半之左右以為薄帝曰百姓租
賦非我有士出萬死賞不過束帛女何功而享多戶邪使知儉嗇
不亦可乎於是公主所稟殆不給車服後咸宜以母愛益封至千

戶諸主皆增自是著于令主不下嫁亦封千戶有司給奴婢如今
上仙公主蚤薨

懷思公主蚤薨葬築臺號登貞

晉國公主始封高都下嫁崔惠童貞元元年與衛楚宋齊宿蕭鄧
紀郃國九公主同徙封

新昌公主下嫁蕭衡

臨晉公主皇甫淑妃所生下嫁郭潛曜薨大曆時

衛國公主始封建平下嫁豆盧建又嫁楊說薨貞元時

真陽公主下嫁源清又嫁蘇震

信成公主下嫁獨孤明

楚國公主始封壽春下嫁吳澄江上皇居西宮獨主得入侍興元
元年請為道士詔可賜名上善

普康公主蚤薨咸通九年追封

昌樂公主高才人所生下嫁竇鏐薨大曆時

永寧公主下嫁裴齊丘

宋國公主始封平昌下嫁温西華又嫁楊徽薨元和時

齊國公主始封興信徙封寧親下嫁張垵又嫁裴頰末嫁楊敷薨

貞元時

咸宜公主貞順皇后所生下嫁楊洄又嫁崔嵩薨興元時

宜春公主蚤薨

廣寧公主董芳儀所生下嫁程昌胤又嫁蘇克貞薨大曆時

萬春公主杜美人所生下嫁楊拙又嫁楊錡薨大曆時

太華公主貞順皇后所生下嫁楊錡薨天寶時

壽光公主下嫁郭液

樂城公主下嫁薛履謙坐嗣岐王珍事誅

新平公主常才人所生幼智敏習知圖訓帝賢之下嫁裴玲又嫁

姜慶初慶初得罪主幽禁中薨大曆時

壽安公主曹野那姬所生孕九月而育帝惡之詔衣羽人服代宗以廣

平王入謁帝字呼主曰蟲娘汝後可與名王在靈州請封下嫁蘇發
肅宗七女

宿國公主始封長樂下嫁巨盧湛

蕭國公主始封寧國下嫁鄭巽又嫁薛康衡乾元元年降回紇英
武威遠可汗乃置府二年還朝貞元中讓府屬更置邑司

和政公主章帝太后所生生三歲后崩養于韋妃性敏惠事妃有
孝稱下嫁柳潭安祿山陷京師寧國公主方整居主棄三子奪潭
馬以載寧國身與潭步日百里潭躬水薪主躬爨以奉寧國初潭
兄澄之妻楊貴妃姊也勢幸傾朝公主未嘗干以私及死撫其子
如所生從玄宗至蜀始封遷潭駙馬都尉郭千仞反玄宗御玄英
樓諭降之不聽潭率折衝張義童等殊死鬪主鼓弓授潭潭手斬
賊五十級平之肅宗有疾主侍左右勤勞詔賜田以女弟寶章主
未有賜固讓不敢當阿布思之妻隸掖廷帝宴使衣綠衣爲倡主
諫曰布思誠逆人妻不容近至尊無罪不可與羣倡處帝爲免出

之自兵興財用耗主以貿易取奇贏千萬澹軍及帝山陵又進
邑入千萬代宗初立屢屢陳人間利病國家盛衰事天子鄉納吐蕃
犯京師主避地南奔次商於遇羣盜主諭以禍福皆稽顙願為奴
代宗以主貧詔諸節度餉億主一不取親紉綻裳衣諸子不服紉
締廣德時吐蕃再入寇主方姓入語備邊計潭固止主曰君獨無
兄乎入見內殿翌日免乳而薨

郟國公主始封大寧下嫁張清薨貞元時

紀國公主始封宜寧下嫁鄭沛薨元和時

永和公主韋妃所生始封寶章下嫁王詮薨大曆時

郟國公主始封延光下嫁裴徽又嫁蕭升升卒主與彭州司馬李
萬亂而蜀州別駕蕭鼎澧陽令韋暉太子詹事李昇皆私侍主
家久之姦聞德宗怒幽主宅第杖殺萬斤鼎暉昇嶺表貞元四年
又以厭蟲廢六年薨子位坐為蠱祝囚端州佩儒德囚房州前生
子駙馬都尉裴液囚錦州主女為皇太子妃帝畏妃怨望將殺之

未發會主薨太子屬疾乃殺妃以厭災諡曰惠

代宗十八女

靈仙公主蚤薨追封

貞定公主蚤薨追封

永清公主下嫁裴儼

齊國昭懿公主崔貞妃所生始封升平下嫁郭曖大曆末寰內民
訴涇水爲碓壅不得溉田京兆尹黎幹以請詔撤碓以水與民時
主及曖家皆有碓丐留帝曰吾爲蒼生若可爲諸戚唱即日毀由
是廢者八十所憲宗即位獻女伎帝曰太上皇不受獻朕何敢違
還之薨元和時贈號國賜諡穆宗立復贈封

華陽公主貞懿皇后所生韶悟過人帝愛之視帝所喜必善遇所
惡曲全之大曆七年以病丐爲道士號瓊華真人病甚嚙帝指傷薨追封
玉清公主蚤薨追封

嘉豐公主下嫁高怡與普寧公主同降有司具冊禮光順門以雨

不克罷薨建中時

長林公主下嫁衛尉少卿沈明貞元二年具冊禮德宗不御正殿不設樂遂爲故事薨元和時

太和公主蚤薨追封

趙國莊懿公主始封武清貞元元年徙封嘉誠下嫁魏博節度使田緒德宗幸望春亭臨餞厭翟敝不可乘以金根代之公主出降乘金根車自主始薨元和時贈封及諡

玉虛公主蚤薨

普寧公主下嫁吳士廣

晉陽公主下嫁太常少卿裴液薨大和時

義清公主下嫁秘書少監柳杲

壽昌公主下嫁光祿少卿竇克良薨貞元時

新都公主貞元十二年下嫁田華具禮光順門五禮由是廢

西平公主蚤薨

章寧公主蚤薨

德宗十一女

韓國貞穆公主昭德皇后所生幼謹孝帝愛之始封唐安將下嫁秘書少監韋宥未克而朱泚亂從至城固薨加封諡

魏國憲穆公主始封義陽下嫁王士平主恣橫不法帝幽之禁中錮士平于第久之拜安州刺史坐交中人貶賀州司戶參軍門下客蔡南史獨孤申叔為主作團雪散雪辭狀離曠意帝聞怒捕南史等逐之幾廢進士科薨追封及諡

鄭國莊穆公主始封義章下嫁張孝忠子茂宗薨加贈及諡

臨真公主下嫁秘書少監薛釗薨元和時

永陽公主下嫁殿中少監崔諲

普寧公主蚤薨

文安公主丐為道士薨大和時

燕國襄穆公主始封咸安下降回紇武義成功可汗置府薨元和

時追封及諡

義川公主蚤薨

宜都公主下嫁殿中少監柳昱薨貞元時

晉平公主蚤薨

順宗十一女

漢陽公主名暢莊憲皇后所生始封德陽郡主下嫁郭縱辭歸第
涕泣自勝德宗曰兒有不足邪對曰思相離無他恨也帝亦泣顧
太子曰貞而子也永貞元年與諸公主皆進封時戚近爭為奢謂事
主獨以儉常用鐵簪畫壁記田租所入文宗尤惡世流侈因主入
問曰姑所服何年法也今之弊何代而然對曰妾自貞元時辭宮
所服皆當時賜未嘗敢變元和後數用兵悉出禁藏織麗物賞戰
士由是散於人間內外相矜恚以成風若陛下示所好于下誰敢不
變帝悅詔宮人視主衣製廣狹徧諭諸主且敕京兆尹禁切浮靡
主嘗誨諸女曰先姑有言吾與若皆帝子驕盈貴侈可戒不可恃

開成五年薨

梁國恭靖公主與漢陽同生始封咸寧郡主徙普安下嫁鄭何薨
追封及諡

東陽公主始封信安郡主下嫁崔杞

西河公主始封武陵郡主下嫁沈翬薨咸通時

雲安公主亦漢陽同生下嫁劉士涇

襄陽公主始封晉康縣主下嫁張孝忠子克禮主縱恣常微行市
里有薛樞薛渾李元本皆得私侍而渾尤愛至謁渾母如姑有司
欲致詰多與金使不得發克禮以聞穆宗幽主禁中元本乃功
臣惟簡子故貸死流象州樞渾崖州

潯陽公主崔昭儀所生大和三年與平恩邵陽二公主並為道士歲
賜封物七百匹

臨汝公主崔昭訓所生蚤薨

虢國公主始封清源郡主徙陽安下嫁王承系薨追封

平恩公主蚤薨

邵陽公主蚤薨

憲宗十八女

梁國惠康公主始封普寧帝特愛之下嫁于季友元和中徙永昌
薨詔追封及諡將葬度支奏義陽義章公主葬用錢四千萬有
詔減千萬

永嘉公主為道士

衡陽公主蚤薨

宣城公主下嫁沈儀

鄭國溫儀公主始封汾陽下嫁韋讓薨追封及諡

岐陽莊淑公主懿安皇后所生下嫁杜棕帝為御正殿臨遣繇西
朝堂出復御延喜門止主車大賜賓從金錢開第昌化里疏龍首
池為沼后家上尚父大通里亭為主別館貴震當世然主事舅姑
以禮聞所賜奴婢偃蹇皆上還丐直自市棕為澧州刺史主與偕

從者不二十婢乘驢不肉食州縣供具拒不受姑寢疾主不解衣藥糜不嘗不進開成中怛自忠武入朝主疾侵曰願朝興慶宮雖死於道不恨道薨

陳留公主下嫁裴損損為太子諭德

貞寧公主下嫁薛翊

南康公主下嫁沈汾薨咸通時

臨眞公主始封襄城下嫁衛洙薨咸通時

普康公主蚤薨

眞源公主始封安陵下嫁杜中立

永順公主下嫁劉弘景

安平公主下嫁劉異宣宗即位宰相以異為平盧節度使帝曰朕

唯一妹欲時見之乃止後隨異居外歲時輒乘駟入朝薨乾符時

永安公主長慶初許下嫁回鶻保義可汗會可汗死止不行大和

中丐為道士詔賜邑印如尋陽公主故事且歸婚貨

義寧公主未及下嫁薨

定安公主始封太和下嫁回鶻崇德可汗會昌三年來歸詔宗正卿李仍叔祕書監李踐方等告景陵主次太原詔使勞問係塗以黠夏斯所獻白貂皮玉指環往賜至京師詔百官迎謁再拜故事邑司官承命荅拜有司議邑司官卑不可當羣臣請以主左右上媵戴鬢帛承拜兩檔持命又詔神策軍四百具鹵簿羣臣班迓主乘輅謁憲穆二室欻流涕退詣光順門易服褫冠鎖待罪自言和親無狀帝使中人勞慰復冠鎖乃入羣臣賀天子又詣興慶宮明日主謁太皇太后進封長公主遂廢太和府主始至宣城以下七主不出迎武宗怒老奪封綰贖罪宰相建言禮始中壺行天下王化之美也請載于史示後世詔可

貴鄉公主蚤薨

穆宗八女

義豐公主武貴妃所生下嫁韋處仁薨咸通時

淮陽公主張昭儀所生下嫁柳正元

延安公主下嫁竇濟

金堂公主始封晉陵下嫁郭仲恭薨乾符時

清源公主薨大和時

饒陽公主下嫁郭仲詞

義昌公主為道士薨咸通時

安康公主為道士乾符四年以主在外頗擾人詔與永興天長寧

國興唐四主還南內

敬宗三女

永興公主

天長公主

寧國公主薨廣明時

文宗四女

興唐公主

西平公主

昭寧公主薨咸通時

光化公主薨廣明時

武宗七女

昌樂公主

壽春公主

長寧公主薨大中時

延慶公主

靜樂公主薨咸通時

樂溫公主

永清公主薨咸通時

宣宗十一女

萬壽公主下嫁鄭顥主帝所愛前此下詔先王制禮貴賤共之萬壽公主奉舅姑宜從士人法舊制車輿以錄金鈿飾帝曰我以儉

率天下宜自近始易以銅主每進見帝必諄勉篤誨曰無鄙夫家無忤時事又曰太平安樂之禍不可不戒故諸主祇畏爭為可喜事帝遂詔夫婦教化之端其公主縣主有子而寡不得復嫁

永福公主

齊國恭懷公主始封西華下嫁嚴邾邾為刑部侍郎主薨大中時追贈及諡

廣德公主下嫁于琮初琮尚永福公主主與帝食怒折匕筋帝曰此可為士人妻乎更許琮尚主琮為黃巢所害主泣曰今日詎不獨存賊宜殺我巢不許乃縊室中主治家有禮法嘗從琮貶韶州侍者纔數人卻州縣饋遺凡內外冠婚喪祭主皆身苦勞疏戚咸得其心為世聞婦

義和公主

饒安公主

盛唐公主

平原公主薨咸通時已而追封

唐陽公主

許昌莊肅公主下嫁柳陟薨中和時

豐陽公主

懿宗八女

衛國文懿公主郭淑妃所生始封同昌下嫁韋保衡咸通十年薨
帝既素所愛自製挽歌羣臣畢和又許百官祭以金貝萬車廄服
火之民爭取煨以沐寶及薨并帝與妃坐延興門哭以過柩仗衛彌
數十里治金爲俑怪寶千計實墓中與乳保同葬追封及諡

安化公主

普康公主

昌元公主薨咸通時

昌寧公主

金華公主

仁壽公主

永壽公主

僖宗二女

唐興公主

永平公主

昭宗十一女

新安公主

平原公主積善皇后所生帝在鳳翔以主下嫁李茂貞子繼卬后
謂不可帝曰不爾我無安所是日宴內殿茂貞坐帝東南主拜殿
上繼卬族兄弟皆西向立主徧拜之及帝還朱全忠移茂貞書取

主還京師

信都公主

益昌公主

唐興公主

德清公主

太康公主

永明公主蚤薨

新興公主

普安公主

樂平公主

贊曰婦人內夫家雖天姬之貴史官猶外而不詳又僖昭之亂典策埃滅故諸帝公主降日薨年粗得其槩亡者闕而不書

諸公主列傳第八

李密列傳第九

唐書八十四

端明學士兼翰林侍讀學士龍圖閣學士朝請李守尚書吏部侍郎兼集賢殿直學士宋 祁奉

敕撰

李密字玄邃一字法主其先遼東襄平人曾祖弼魏司徒賜姓徒
何氏入周爲太師魏國公祖暉邢國公父寬隋上柱國蒲山郡公
遂家長安密趣解雄遠多策略散家貲養客禮賢不受藉以蔭爲
左親衛府大都督東宮千牛備身領銳角方瞳子黑白明澈煬帝
見之謂字文述曰左仗下黑色小兒爲誰曰蒲山公李寬子密帝
曰此兒顧盼不常無入衛它日述諭密曰君世素貴當以才學顯
何事三衛閒哉密大喜謝病去感厲讀書聞包愷在緱山往從之
以蒲韉乘牛挂漢書一帙角上行且讀越國公楊素適見于道按
轡躡其後曰何書生勤如此密識素下拜問所讀曰項羽傳因與
語奇之歸謂子玄感曰吾觀密識度非若等輩玄感遂傾心結納
嘗私密曰上多忌隋曆且不長中原有一日誓公與我孰後先密

曰使兩陣之勝噫嗚咄嗟足以龍言敵我不如公嗚呼天下英雄馭之使遠近歸屬公不如我大業九年玄感舉兵黎陽遣人入關迎密密至謀曰今天子遠在遼左去幽州尚千里南限鉅海北阻彊胡號今所通惟榆林一道爾若鼓而入薊直扼其喉高麗抗其前我乘其後不旬月齎糧竭舉麾召之衆可盡取然後傳檄而南天下定矣上計也關中四塞之地彼留守衛文昇易人耳若徑行勿留直保長安據函嶺東制諸夏是隋亡襟帶我勢萬全中計也若因近趣便先取東都頓兵堅城下不可以勝負使下計也玄感曰公之下計乃吾上策今百官家屬皆在洛當先取之以搖其心且經城不拔何以示武密計不行玄感至東都所戰必克自謂功在旦暮既獲內史舍人韋福嗣遂任之故謀不專密福嗣恥見執策議皆持兩端密揣其貳謂玄感曰福嗣窮爲我虜志在觀望公初舉大事茲人在側事必敗請斬以徇不從密謂所親曰玄感好反而不圖勝吾屬虜矣福嗣果遁去會左武侯大將軍李子雄得罪傳

送行在道殺使者奔玄感勸舉大號玄感問密密曰昔張耳諫陳勝自王荀彧止魏武求九錫皆見疑外今密將無類之乎然阿諛順旨非義士也且公雖屢勝而郡縣未有應者東都尚彊救兵踵來公當率精甲身定關中柰何亟自帝玄感笑而止及隋軍至玄感曰策安汝密曰元弘嗣方戎隴右可陽言其反使迎我因引軍西從之至陝欲圍弘農宮密曰今給衆入關機在速而追兵踵我若前不得據險退無所守何以共完玄感不聽留攻三日不能拔引去至閩鄉追及而敗密羸行入關爲邏所獲與支黨護送帝所密謂衆曰吾等至行在且菹醢今尚可以計脫何爲安就鼎鑊衆然之乃今出所有金示監使曰即死幸報德使者顧金禁漸弛益市酒飲咲謹諱守者解密等遂夜亡去抵平原賊郝孝德不見禮去之淮陽歲饑削木皮以食變姓名爲劉智遠教授諸生自給鬱鬱不得志哀吟泣下人有告太守趙佗者佗捕之遁免往依媚婿雍丘令丘君明轉匿大使王季才家爲吏迹捕復亡去時東郡賊

翟讓聚黨萬人密因介其徒王伯當以策干讓曰今主昏於上人怨於下銳兵盡之遼海和親絕於突厥南巡流連空棄關輔此實劉項挺興之會足下資豪傑士馬精勇指罪誅暴爲天下先楊氏不足亡也讓由是加禮遣說諸賊至輒下因爲讓計曰今稟無見糧難以持久卒遇敵其亡無時不如取滎陽休兵館穀待士逸馬肥乃可與人爭利讓聽之遂破金隄關徇滎陽諸縣皆下滎陽太守楊慶河南討捕大使張須陁合兵討讓讓素憚須陁欲引去密曰須陁健而無謀且驟勝易驕吾爲公破之讓不得已陣而待密率驍勇常何等二十人爲游騎伏千兵莽閒須陁素輕讓引兵搏之讓少却伏發與游軍乘之遂殺須陁十三年讓分兵與密別爲牙帳號蒲山公密持軍嚴雖盛夏號令士皆若負霜雪然戰得金寶盡散之繇是人爲用復說讓曰今羣豪競興公宜先天下攘除羣凶寧常剽奪草閒求活哉若直取興洛倉發粟以賑窮乏百萬之衆一朝可附霸王之業成矣讓曰僕起鄙隴志不及此須君得倉

更議之二月密以千人出陽城北踰方山自羅口拔興洛倉據之
獲縣長柴孝和開倉賑食衆繼屬至數十萬隋越王侗遣將劉長
恭房崩討密又令裴仁基統兵出成臯西密乃爲十隊跨洛水抗
東西二軍令單雄信徐世勣王伯當騎爲左右翼自引麾下急擊
長恭等破之東都震恐衆保太微城臺寺俱滿讓等乃推密爲主
建號魏公鞏南設壇場即位刑牲敵血改元永平大赦其文移稱
行軍元帥魏公府以讓爲司徒邴元真左長史房彥藻右長史楊
德方左司馬鄭德韜右司馬單雄信左武侯大將軍徐世勣右武
候大將軍祖君彥記室城洛口周四十里居之命護軍將軍田茂
廣造雲梯三百具以機發石爲攻城械號將軍礮進逼東都燒上
春門四月隋虎牢將裴仁基淮陽太守趙佗降長白山賊孟讓以
所部歸密以仁基爲上柱國與讓率兵二萬襲回洛倉守之入都
城掠居人火天津橋隋出軍乘之仁基等敗還保鞏司馬楊德方
戰死密自督衆三萬破隋軍於故城復得回洛倉俄而德韜死乃

以鄭頌爲左司馬鄭虔象右司馬諸賊帥黎陽李文相洹水張昇
清河趙君德平原郝孝德皆歸密因襲取黎陽倉永安大族周法
明舉江黃地附之齊郡賊徐圓朗任城大俠徐師仁來歸密令幕
府移檄州縣列煬帝十罪天下震動護軍柴孝和說密曰秦地阻
山帶河項背之亡漢得之王今公以仁基壁回洛翟讓保洛口公
束鎧倍道趨長安百姓誰不郊迎是征而不戰也衆附兵彊然後
東向指搗豪桀天下廓廓無事矣今遲之恐爲人先密曰僕懷此
久顧我部皆山東人今未下洛安肯與我偕西且諸將皆羣盜不
相統一敗則掃地矣遂止是時隋軍益出密負銳急與之碭中流
矢卧營中隋軍乘之密衆潰弃倉守洛口高祖起師太原密自謂
主盟遣將軍張仁則致書于帝呼爲兄請以步騎會河內帝覽書
笑曰密陸梁不可折簡致之吾方定京師未能東略若不與是生
一隋密適爲吾守成臯拒東都兵使不得西更遣票將莫如密吾
寧推順使驕其志我得留撫關中大事濟矣今記室温大雅作報

書厚禮尊讓密大喜示其下曰唐公見推顧天下無可慮者遂專
事隋九月遣將李士才將兵十二萬攻隋鷹揚郎將張珣河陰舉
之珣極罵不屈死齊方士徐鴻客上書勸密因士氣趨江都挾帝
以今天下密異其言具幣邀之已亡去煬帝遣王世充選卒十萬
擊密世充營洛西戰不利更陳洛北登山以望洛口密引度洛與世
充戰密兵多騎與長槩而北薄山地隘騎走不得騁世充多短兵
盾積盛之密軍卻世充乘勝進攻密月城密還洛南引而西突世
充營世充奔還師徒多喪孝和溺死洛水密哭之慟自是大小六
十餘戰翟讓部將王儒信憚密威望勸讓自爲大冢宰摠秉衆
務收密權讓兄寬亦曰天子當自取何乃授人密聞之與鄭頊陰
圖讓會世充兵又至讓出拒少退密馳助之戰石子河世充走明
日高會饗士讓至密所密令房彥藻引其左右就別帳飲密出名
弓示讓讓挽滿遣劍士蔡建從後擊之并殺其兄姪及儒信密馳
入讓壁慰諭士無敢動者以徐世勣單雄信王伯當分統其兵隋

將楊慶守滎陽因說下之世充夜襲倉城密伏甲殪其衆義寧二年世充復營洛北爲浮梁絕水以戰密以千騎迎擊不勝世充進薄其壘密提敢死士數百邀之世充大潰士爭橋溺死者數萬洛水爲不流殺大將六人獨世充脫會夜大雨雪士卒僵死且盡密乘銳拔偃師脩金墉城居之有衆三十萬又與東都留守韋津戰上春門執津於陣將作大匠宇文愷子儒童河南留守職方郎柳續河陽都尉獨孤武都河內郡丞柳燮皆降於是海岱江淮間爭響附竇建德朱粲揚士林孟海公徐圓朗盧祖尚周法明等悉上表勸進府官屬亦請之密曰東都未平且勿議五月越王侗稱帝六月宇文化及擁兵十餘萬至黎陽侗遣使授密太尉尚書令東南道大行臺行軍元帥魏國公令平化及而後入輔密受之乃引兵東追化及黎陽密知化及乏食利速戰乃持重以老其兵使徐世勣保黎陽倉化及攻不可下密與隔水陣遙謂化及曰公家本戎隸破野頭爾父子兄弟受隋恩至妻公主上有失德不能諫又

虐弑之冒天下之惡今安往能即降尚全後嗣化及默然良久乃
瞋目爲鄙語辱密密顧左右曰此庸人圖爲帝吾當折箠驅之乃
以輕騎五百焚其攻具火終夜不滅度化及糧盡乃僞與和化及
喜使軍恣食旣而密饋不至乃寤遂大戰童山下密中矢頓汲縣
堅壁化及勢窮掠汲郡趣魏縣其將陳智略張童仁等率所部兵
歸密前後相踵初化及留輜重東郡遣所署刑部尚書王軌守之
至是軌舉郡降密由是引而西遣使朝東都執弑逆人于弘達獻
於侗侗召密入朝至温間世充殺元文都乃止遂歸金墉拘侗使
不遣初密旣殺翟讓心稍驕不卹士素無府庫財軍戰勝無所賜
與又厚撫新集人心始離民食興洛倉者給授無檢至負取不勝
委於道踐輒狼扈密喜自謂足食司倉賈潤甫諫曰人國本食人
天今百姓飢捐暴骨道路公雖受命然賴人之天以固國本而稟
取不節敖庾之藏有時而餽粟竭人散胡仰而成功不聽徐世勣
數規其違密內不意使出就屯故下苟且無固志初世充乏食密

少帛請交相易難之邴元真好利陰勸密許焉後世充士飽降者益少密悔而止武德元年九月世充悉衆決戰先以騎數百度河密遣迎戰驍將十餘人皆被創返明日密留王伯當守金墉自引精兵出偃師北阻邗山待之密議所便裴仁基曰世充悉勁兵來東都必虛請選衆二萬向洛世充必自拔歸我整軍徐還兵法所謂彼歸我出彼出我歸以疲之也密眩於衆不能用仁基擊地嘆曰公後必悔遂出兵陣世充陰索類密者使縛之既兩軍接埃霧踴塞世充軍江淮士出入若飛密兵心動世充督衆疾戰使牽類密者過陣譟曰獲密矣士皆呼萬歲密軍亂遂潰裴仁基祖君彥皆爲世充所禽偃師劫鄭頊叛歸世充密提衆萬餘馳洛口將入城邴元真已輸款世充潛導其軍密知不發期世充度兵半洛水掩擊之候騎不時覺比出世充絕河矣即引騎遁武牢元真遂降衆稍散密將如黎陽或曰向殺翟讓世勣傷幾死瘡猶未平今可保乎時王伯當棄金墉屯河陽密輕騎歸之謂曰敗矣久苦諸

君我今自刎以謝衆伯當抱密慟絕衆皆泣莫能仰視密復曰幸不相棄當共歸關中密雖無功諸君必富貴掾柳燮曰昔盆子歸漢尚食均輸公與唐同族雖不共起然遏隋歸路使無西故唐不戰而據京師亦公功也密又謂伯當曰將軍族重豈復與孤俱行哉伯當曰昔蕭何舉宗從漢今不昆季盡行以爲媿豈公一失利輕去就哉雖隕首亮曾所甘已左右感動遂來歸初密建號登壇疾風鼓其衣幾仆及即位狐鳴於旁惡之及將敗鞏數有回風發於地激砂礫上屬天白日爲晦屯營羣鼠相銜尾西北度洛經月不絕及入關兵尚二萬高祖使迎勞冠蓋相望密大喜謂其徒曰吾所舉雖不就而恩結百姓山東連城數百以吾故當盡歸國功不減竇融豈不以台司處我及至拜光祿卿封邢國公殊怨望帝嘗呼之弟妻以表妹獨孤氏後禮寢薄執政者又求賄滋不平因朝會進食謂王伯當曰往在洛口嘗欲以崔君賢爲光祿不意身自爲此未幾聞故所部將多不附世克者高祖詔密以本兵就

黎陽招撫故部曲經略東都伯當以左武衛將軍爲密副馳駟東至稠桑驛有詔復召密密大懼謀叛伯當止之不從乃曰士立義不以存亡易慮公顧伯當厚願畢命以報今可同往死生以之然無益也乃簡驍勇數十人衣婦人服戴罽羅藏刀裙下詐爲家婢妾者入桃林傳舍須臾變服出據其城掠畜產趣南山而東馳告張善相以兵應已熊州副將盛彥師率步騎伏陸渾縣南邢公岷之下密兵度橫出擊斬之年三十七伯當俱死傳首京師時徐世勣尚爲密保黎陽帝遣使持密首往招世勣世勣表請收葬詔歸其尸乃發喪具威儀三軍編素以君禮葬黎陽山西南五里墳高七仞密素得士哭多歐血者郟元真之降也世充以爲行臺僕射鎮滑州密故將杜才幹恨其背密僞以兵歸之斬取其首祭密冢已乃歸國

單雄信曹州濟陰人與翟讓友善能馬上用槍密軍中號飛將偃師敗降世充爲大將秦主圍東都雄信拒戰槍幾及王徐世勣呵

之曰秦王也遂退後東都平斬洛渚上

祖君彥齊僕射孝徵子博學彊記屬辭瞻速薛道衡嘗薦之隋文帝帝曰是非殺斛律明月人兒邪朕無用之煬帝立尤忌知名士遂調東都書佐檢校宿城令世謂祖宿城負其才常鬱鬱思亂及爲密草檄乃深斥主闕密敗世充見之曰汝爲賊罵國足未君彥曰跣客可使刺由但愧不至耳世充令撲之旣困卧樹下世充已自欲盜隋中悔命醫許惠照往視之欲其蘇郎將王拔柱曰弄筆生有餘罪乃感其心即死戮尸於偃師

贊曰或稱密似項羽非也羽興五年霸天下密連兵數十百戰不能取東都始立感亂密首勸取關中及自立亦不能鼓而西宜其亡也然禮賢得士乃田橫徒歟賢陳涉遠矣噫使密不爲叛其才雄亦不可容於時云

李密列傳第九

...

...

...

...

...

...

...

...

...

...

...

...

王寶列傳第十

唐書八十五

端明學士兼翰林侍讀學士龍圖閣學士朝請大夫守尚書都督契丹使兼管內諸軍使祁奉
救撰

王世充字行滿祖西域胡號支頽穉後徙新豐死其妻與霸城人
王粲為庶妻頽穉子收從之冒粲姓仕隋歷懷汴二州長史生世
充豺聲卷髮忌刻深阻涉書傳喜兵法通龜策推步以蔭為左翊
衛遷御府直長兵部員外郎從楊素北伐為幽州長史大業初為
民部侍郎善占對習法敢舞文上下人或辨駁世充以口舌緣飾
衆知其非亦不能屈也出為江都贊治遷郡丞煬帝數南幸世充
善伺帝顏色阿色順旨性機巧飾臺沼陰奏遠方珍物以媚帝帝
愛昵之拜江都通守兼知宮監事世充觀隋政方亂而江左浮粟
易動乃陰結豪桀有繫獄者皆撓法貸減以樹私恩楊玄感反吳
人朱燮晉陵人管崇起江南應之兵十餘萬隋將吐萬緒魚俱羅
討之不克世充以偏將募江都萬人頻擊破之每捷必歸功於下

虜獲盡推與士卒故人爭為效由是功最多大業十年齊賊孟讓
轉寇諸郡至盱眙世充拒之保都梁山列五壁不戰羸兵以示弱
讓笑曰世充文法吏安知兵吾今生縛之鼓行下江都矣時百姓
皆入保野無所掠讓衆餒又苦五壁閉道不得南即分兵圍之世
充數戰陽不利走壁讓益驕數日稍分其下南略裁留兵足圍壁
世充知賊懈夜夷竈撤幕為方陣外向毀垣旦而出奮擊大破之
讓以數十騎去斬首萬級虜十餘萬人煬帝以世充有將帥略復
委捕諸盜所向輒定會突厥圍帝鴈門世充悉發江都兵赴難詐
為可喜事以邀聲譽在軍蓬首垢面日夜悲泣不釋甲卧必席藁
帝以為忠愈屬信之厭次賊格謙兵十餘萬屯亘子甌太僕卿楊
義臣殺謙世充討其餘黨夷之進擊賊盧明月於南陽俘係數萬
還帝自持酒為勞世充啓帝江淮良家女願備後廷無繇進帝喜
令閔端麗者以庫貲為聘費不可校署計簿云敕別用有司不敢
聞具舟送東都宮會道路剽奪使者苦之或沈舟亡去世充屏不

奏李密逼東都詔世充爲將軍以兵屯洛口大小百餘戰無大
勝負詔即拜右翊衛將軍趣破賊十四年世充引軍與密戰洛南
有氣若城壓其營世充大敗衆幾盡走保河陽自繫獄請罪於越
王侗侗以書慰勉賜金帛安之召還洛哀亡散得萬人屯含嘉城
畏縮不敢出會江都弒逆羣臣奉侗爲帝以世充爲吏部尚書封
鄭國公宇文化及擁兵北還侗聽內史令元文都盧楚等謀以重
官畀李密使計賊若化及破而密兵亦疲乘其弊可得志乃遣使
以太尉尚書令即軍中拜密趣兵北討密稱臣奉制引兵從化及
黎陽戰勝來告衆大悅世充獨謂其下曰文都等刀筆才必爲密
禽且我軍與賊戰多殺其父子兄弟一旦爲之下吾屬無類矣以
此言激衆文都等聞大懼侗欲以文都爲御史大夫世充不許曰
嘗與公等約左右僕射尚書令御史大夫留待勳崔昂及魯欲得則
流競開矣何以共守文都憾焉潛與楚謀因世充入殿伏甲殺之
納言段達庸怯畏不果馳告世充世充夜以兵襲含嘉門圍宮城

右武衛大將軍皇甫無逸等遣將費曜田閻拒戰太陽門曜敗卬
充入之無逸以單騎遁收楚殺之時紫微宮尚閉卬扣門給伺
曰元文都等欲執陛下降李密臣不反誅反者耳段達執文都送卬
充殺之卬充悉遣腹心代衛士然後入謝曰文都楚無狀規相屠
戮臣急爲此非敢它伺與之盟進拜尚書左僕射摠督內外諸軍
事乃去令嘉城居尚書省專掌朝政以其兄卬惲爲內史令居禁
中子弟皆將兵分官吏爲十頭以主軍政未幾李密破化及還屯
金墉勁兵良馬多死卬欲擊之恐士心未一乃謀以鬼動衆令
德陽門衛張永通言巫人謂己曰我周公能以兵助討密卬充
白伺立祠洛旁使巫宣言周公令急擊密有大功不然兵且疫卬
充下皆楚人信妖遂請戰乃簡精卒二萬騎二千跨洛水爲三橋
以度兵密軍偃師北山新破敵有輕卬充心不設壁壘卬充夜遣
二百騎蔽山伏因秣馬蓐食遲明薄之密陣未成伏兵上北原乘
高馳下壓其營縱焚廬落密衆大潰降其將張童仁陳智略進

拔偃師初密得世充兄世偉及子女應於化及軍囚之至是皆歸
世充兵次洛口密長史邴元真司馬鄭虔象以城降悉收美人寶
貨而還密以數十騎跳奔於是世充自爲太尉尚書令加黃門印
綬綏綬以尚書省爲府置官屬乃設三榜於府外其一求文學堪
濟世務者其一武幹絕衆推鋒陷陣者其二能治冤抑不申者繇
是上書陳事日數百皆慰勞省接雖吏卒必飾詞誘納而世充素
詭妄不能讎其語士大夫遂貳初殺文都欲詭衆取信乃請事伺
母劉太后爲假子至是加號聖感太后散騎常侍崔德本曰此王
莽文母何異乎後食伺前得嘔疾疑見毒遂不復朝以將張績董
濬衛宮城武德二年矯伺詔假黃鉞相國摠百揆封鄭王授九錫
冕十有二旒建天子旌旗金根車駕六馬備五時副車旄頭雲罕
舞八佾設官縣出入警蹕術士桓法嗣自言能決讖乃上孔子閉
房記畫男子持一干驅羊狀因說世充曰隋楊姓也於文干一爲
王王處羊後大王代隋之符又陳莊周人閒世德充符二篇曰上

下篇與大王名協明受符命德被人間爲天子也世充喜曰天命也拜受之以法嗣爲諫議大夫又羅取飛鳥書符命於帛繫鳥頸縱之有彈捕得鳥而獻者亦拜官諷百官勸進時納言蘇威老就第世充以威隋大臣有素望每表必署名使段達等脅伺曰天命不常今鄭王功德甚盛請揖讓用堯舜故事伺怒曰天下者高祖天下若隋德未究此言不可發必天命遂改尚何禪公非先帝舊臣乎朕何賴達等流涕世充又詐曰天下未定須鎮以長君待天下安則復子明辟四月矯伺策禪位幽伺於含涼殿猶三讓遣諸將以兵清宮世充襲戎服法駕導鼓吹入宮每歷一門從者必呼至東上閣更衣冕即正殿僭位建元開明國號鄭乃封兄世衡爲秦王世偉楚王世暉齊王諸族屬以次封拜以子玄應爲皇太子玄恕爲漢王世充每聽朝決政誨諭言語諄複百緒以示勤篤百司奏事者聽受爲疲出則輕騎無警蹕游歷衢肆行者但止立徐謂百姓曰故時天子居九重在下之情無繇察世充非貪位者

本救時耳正若一州刺史事皆親覽當與士人共議之恐門衛有禁無以盡通今止順天門外置座聽事又詔西朝堂聽冤訴東朝堂延諫者繇是章牘填委觀省不暇後亦不能復出五月裴仁基與其子行儼及宇文儒童崔德本等謀劫世充復立侗不克夷三族六月鳩殺侗以絕衆望世充率衆東徇地至滑以兵臨黎陽時黎陽為竇建德守故建德亦破世充躬州以報其役三年下書大赦築練兵臺於伊闕守將羅士信豆盧達稍稍歸國世充顧下多背己乃峻誅暴禁以威之戶一人逃家無少長皆坐父子兄弟夫婦許相告免令伍伍相保一家叛舉伍誅樵牧出入皆為限公私不聊生遣臺省官督十二郡營田行者自謂仙去以宮城為大獄意所猜惡必收繫其人內家屬官中或命將亦質其孥乃遣既而囚質且萬口食不足餓死者日數十七月高祖詔秦王率兵攻之至新安屯保多下敗世充於慈澗城八月王陳兵青城宮世充悉精兵來拒隔澗言曰隋失其國天下分崩長安洛陽各有分地

吾常自守不敢西顧熊穀二州在度內不取敦鄰好也今王遠涉
吾地越三嶠饋糧千里勤師遠出將何求王曰四海之人皆承唐正
朔獨公迷不復東都士民來請師陛下重違我是以來公若降富
貴可保必拒我勉之無多言世充約割地不許潁州摠管田瓚請
舉山南二十五郡歸九月王君廓進拔輜轅徇地至管城河南州
縣以次降定始竇建德與世充隙至是建德遣使結好并陳赴援
意世充遣兄子琬內史令長孫安世報且乞師四年二月青城宮
守將以宮降王進保之世充引兵出方諸門臨穀水以戰王陣北
卽令屈突通步士五千踰水擊之兵接王以騎決戰世充排攢兵
殊死鬪自辰及午乃潰俘斬八千人王傅城塹而守之世充糧且
盡人相食至以水汨泥去礫取浮土糴米屑爲餅民病腫股弱相
藉倚道上其尚書郎盧君業郭子高等皆餓死御史大夫鄭頊丐
爲浮屠屠世充惡其言殺之然氣竭但嬰城須建德之救五月王禽
建德并獲王琬長孫安世俘示東都城下且遣安世入言敗狀世

元惶惑將突圍出保襄漢謀於諸將皆不荅遂率將吏降軍門王受之以屬吏陳兵入城發府庫資將士其黃門侍郎薛德音以移檄慢逆崔弘丹造弩多傷士前誅之又收段達楊汪孟孝義單雄信楊公卿郭士衡郭什柱董濬張童仁朱粲王德仁等斬洛渚上以世充歸長安高祖數其罪世充曰計臣罪不容誅但秦王許臣以不死乃赦為庶人與其族徙于蜀將行為羽林將軍獨孤脩德所殺初脩德父機嘗仕越王侗世充既篡謀歸唐為所屠者也高祖免脩德官子立應兄世偉在道謀反伏誅世充篡凡三年滅竇建德貝州漳南人世為農自言漢景帝太后父安成侯元之苗裔材力絕人少重然許喜俠節鄉人喪親貧無以葬建德方耕聞之太息遽解牛與給喪事鄉黨異之盜夜劫其家建德立戶下盜入擊三人死餘不敢進請其尸建德曰可投繩係取之盜投繩建德乃自縻使盜曳出躍起捉刃復殺數人繇是益知名為里長犯法亡曾赦歸久之父卒里中送葬千餘人所贈子皆讓不受隋

大業七年募兵伐遼東建德補隊長方如軍會邑人孫安祖盜羊
爲縣令捕劾笞辱安祖刺殺令亡抵建德建德陰舍之時山東饑
羣盜起乃謀曰徃文皇帝時天下盛彊發百萬衆伐遼東猶爲所
敗今水潦爲災民力凋敝主上不是恤而親駕臨遼且往歲西征
十不一返今創夷未平又重發兵人情危駭易以搖動丈夫不死
當建功于世渠爲亡命虜乎我聞高雞泊廣袤數百里葭蘆阻奧
可以違難承間竊出椎埋掠殺足以自資因得聚豪桀且觀時變
以就大計安祖然之建德爲招亡兵及民無產者數百使安祖率
之入高雞爲盜安祖號摸羊公時郟人張金稱亦結衆萬餘依河
渚間脅入高士達兵千餘屯清河鄙上諸盜徃來漳南者多剽殺
人焚鄉聚獨不入建德聞郡縣意建德與賊通捕族其家建德
至河間聞家屠滅即率麾下二百人亡歸士達士達自稱東海公
以建德爲司兵安祖爲金稱所殺其下數千人歸建德衆益盛至
萬人猶保高雞泊然傾身接物其執苦與士卒均由是能致人死

力十二年涿郡通守郭絢率兵萬人討士達士達自以智略不及建德乃推爲軍司馬以兵屬焉建德既統衆思用奇猷伏羣盜乃請士達守輜重自以精兵七千迎絢詐爲亡狀士達取所虜陽言建德妻子殺之建德遺絢書約降請前驅執賊自效絢信之引兵從建德至長河界欲與盟兵懈不設備建德襲殺其軍數千人獲馬千匹絢以數十騎去追斬於平原獻首士達威振山東隋遣太僕卿楊義臣討破張金稱於清河殘黨畏誅復屯嘯歸建德義臣乘勝欲遂入高雞泊窮剗根穴建德謂士達曰隋善將獨義臣耳新破金稱其鋒不可當宜引兵避之彼欲戰不得軍老食乏乘之可有功士達不納留建德守壁身將兵逆戰置酒享士建德聞曰東海公未捷遽自矜大禍至不日矣隋兵勝必長驅而來吾不能獨支乃留衆保壁帥銳士據險待後五日義臣斬士達於陣追北薄壘守兵潰建德不能軍以百餘騎走饒陽饒陽無備因取之義臣已殺士達謂餘黨不足憂引去故建德得還平原收士達士死

此肉葬焉為士達發喪軍皆縞素招潰卒得數千人軍復振自稱將
軍初佗盜得隋官及士人必殺之唯建德恩遇甚備引故饒陽長
宋正本為客尊任之參決軍議隋郡縣吏多以地歸之勢益張兵
至十餘萬上谷賊王須拔自號漫天王以兵略幽州戰死其下魏刀兒號
歷山飛壁深澤衆十萬建德以計龍取之并有其地十三年正月築壇
場於河間樂壽自立為長樂王十四年五月更號夏王建元丁丑署官
屬分治郡縣七月隋右翊衛將軍薛世雄督兵三萬討之屯河間七里
井建德以勁兵伏旁澤中悉拔諸城偽遁世雄以為畏稍弛備建德率
敢死士千人襲之會大霧晝冥跣不可視隋軍驚遂潰相騰藉死者如丘
世雄引數百騎亡去盡得其衆獲河間丞王琮勞遣之琮復嬰城建德
進攻未下而河間食盡聞煬帝遇弒琮率吏發喪乘城大臨建德遣使
入弔琮因請降建德為退舍飭饌具琮率郡屬素服面縛軍門建
德親釋微纒與言隋之亡琮伏哭極哀建德亦為泣麾下或言河
間久拒守多殺士今力窮而下請烹之建德曰琮誼士也吾方旌

擢以勸事君者且往爲盜可妄殺人今將安百姓定天下而害忠
臣乎即令其軍曰與琮隙者敢輒搖罪三族乃授琮瀛州刺史始
都樂壽號金城宮備百官準開皇故事冬至大會僚吏有五大鳥
集其宮羣鳥從之又宗城人獻立圭一景城丞孔德紹曰昔天以
是授禹今瑞與之伴國宜稱夏建德然之改元五鳳以德紹爲內
史侍郎武德元年字文化及至魏縣建德謂其納言宋正本及德
紹曰吾隋民也隋吾君也今化及殺之大逆不道乃吾讎欲爲天
下誅之何如正本等曰大王奮布衣起漳南隋之列城莫不爭附
者以能杖順扶義安四方也化及爲隋姻里伺之不疑今戕君而
移其國仇不共天請鼓行執其罪建德善之即引兵討化及連戰
破之化及保聊城乃縱撞車機石四面乘城拔之建德入先謁蕭
皇后語稱臣執宇文智及楊士覽元武達許弘仁孟景等召隋文
武官共臨斬之梟首棘門囚化及并其子載以檻車至大陸縣斬
之建德性約素不喜食肉飯脫粟加蔬具妻曹未嘗衣紵綺及爲

王妾侍裁十數每下城破敵皆寶竝散賚將士至是得隋宮人尚
千數悉放去其文武驍果尚萬餘各聽所之乃以誅化及報越王
侗侗封之夏王遂號大夏以隋黃門侍郎裴矩爲尚書右僕射兵
部侍郎崔君肅爲侍中少府令何稠爲工部尚書餘隨才署職委
以政事有願往關中及東都者恣聽不留仍給道里費以兵護出
于境二年陷邢趙滄三州復陷冀州執刺史麴稜赦之復以爲刺
史八月陷洺州虜刺史表子幹遂遷都焉更號萬春宮使人如灌
津祠充墓置守冢三十家又遣使朝侗因與王世充結歡北聘突
厥士馬益精雄俄而世充廢侗乃絕之始建天子旌旗出入警蹕
書稱詔追諡隋煬帝爲閔帝以齊王暕子政道爲鄭公義成公主
在突厥遣使迎蕭后建德自將千餘騎送之并獻化及首未幾連
突厥侵相州刺史呂珉死之進攻衛州執河北大使淮安王神通
同安長公主黎陽守將李世勣釋之復使世勣守黎陽館王公主
饋以客禮滑州刺史王軌爲奴所殺奴以首奔建德建德曰奴殺

主大逆納之不可不賞賞逆則廢教將焉用爲命斬故而返軌首
滑人德之遂降齊濟二州亦降兗賊徐圓即聞風送款三年世勣
自拔歸國吏白建德誅其父建德曰世勣唐臣不忘其主忠也父
何罪釋不問高祖遣使脩好建德即以公主等歸京師嘗執趙州
刺史張志昂邢州刺史陳君賓大使張道源等將殺之國子祭酒
凌遊諫曰夫犬吠非其主彼悉力堅守以窮就禽伏節士也今殺
之無以勸建德怒曰我傳其城猶不下勞費士旅何可赦游曰王
之大將高士興抗羅莖於易南兵未交士興即降王以爲可乎建
德悟即釋之然其大將王伏寶數持兵功略在諸帥上或讒其反
建德殺之伏寶臨死呼曰我無罪王何信讒自刈左右手乎後戰
數不利九月建德自帥師圍幽州爲羅莖所敗莖乘勝襲其營
建德陣營中填塹而出敗莖粟進薄其城不能拔乃還濟陰賊孟
海公兵三萬據周橋城以掠河南建德自擊之會秦王伐東都其
中書舍人劉斌獻說曰唐據關內鄭王河南夏有冀方此鼎足相

持勢也今唐悉兵臨鄭出入二年鄭人曰感二國兵不解唐彊鄭弱勢必舉鄭滅則大夏有齒寒之慮爲大王計莫若援鄭使鄭抗其內我攻其外唐之兵必卻唐卻而鄭完然後徐觀其變鄭若可圖因而取之并二國兵乘唐師老長驅而西關中可遂有也建德曰善乃遣使聘世充與連和會世充亦自乞師即令其臣李大師魏處繪來朝請解鄭圍秦王留之不荅四年建德克周橋虜海公留其將范願戍之悉發海公徐圓卽之衆并兵號三十萬救世充至滑州世充行臺僕射韓弘開城納之建德進逼元梁管三州皆陷遂屯滎陽運糧沂河西上舟相屬不絕壁成臯東原築營板渚遣使與世充約期又遣秦王以書三月王進據虎牢翌日以騎五百覘建德營設伏道側獨以數騎去賊營三里覺賊出騎追之王漸卻誘至伏所卒起奮擊賊騎驚引去追斬三百級獲其將殷秋石璿乃報建德以書建德失二將又聞唐兵精得書猶豫頓六十日不敢西時世充弟世辯爲徐州行臺亦遣將郭士衡兵數千人從建

德王遣王君廓以輕騎抄其饗執賊大將張青特建德懼人情攜駭其諸將又新破海公掠獲盈給日夜思歸凌敬說建德曰今唐以重兵圍東都守虎牢我若悉兵濟河取懷州河陽以重將戍之然後鳴鼓建旗踰太行入上黨傳檄旁郡進壺口以駭蒲津收河東地此上策也且有三利乘虛擣境師有萬全一也拓土得衆二也鄭圍自解三也建德將從之而王琬長孫安世日請兵西每言必涕涕又陰齎金玉啗諸將以撓其謀衆乃曰凌敬書生豈知戰建德乃謝曰今士心銳天贊我也師將大捷方用衆議不得如公言敬固爭建德怒命扶出其妻諫曰祭酒計甚善王盍用之夫自盜口道乘唐之虛連營漸進以取山北因招突厥西抄關中唐必還師自救鄭難紓矣今頓兵虎牢下徒自苦恐無功建德曰此非女子所知且鄭朝暮待吾來既許之豈可見難而退且示天下不信五月建德自板渚出爲陣西薄汜南屬鵲山亘二十里鼓而前郭士衡爲游兵秦王登虎牢城望其軍按甲不戰曰賊起山東未

嘗見大敵今度險士囂令不肅也逼城而陣有輕我心待其飢破之果矣日中建德士皆坐列渴爭飲意益怠王麾軍先登騎怒塵大漲乃率史大柰秦叔寶纏麾幟馳出賊陣後建德軍顧而驚遂大潰建德被重創竄牛口谷車騎將軍白士讓楊武威獲之傳而西斬長安市年四十九初其軍有謠曰豆入牛口勢不得久至是果敗建德妻與其左僕射齊善行以騎數百遁還洛州餘黨欲立其養子爲主善行曰夏王奄定河朔號爲威彊今一出不復非天命有歸哉不如委心請命無爲塗炭生民也遂分府庫散給將士令各解去善行乃與右僕射裴矩行臺曹旦率官屬及建德妻奉山東地并傳國八璽來降建德起兵至滅凡六年

贊曰煬帝失德天醜其爲生人顛享羣盜乘之如蝟毛而奮其劇者若李密因黎陽蕭銑始江陵竇建德連河北王世充舉東都皆磨牙搖毒以相噬螯其間亦假仁義禮賢才因之擅王僭帝所謂盜亦有道者李夫薛子氣腥焰所以亡隋觸唐明德折北不支禍極

凶殫乃就殲夷宜哉

王實列傳第十

薛李二劉高列傳第十一

唐書八十六

端明殿學士兼翰林侍讀學士龍圖閣學士朝請李尚書吏部侍郎吳集賢殿脩撰官宋

祁奉

敕撰

薛舉蘭州金城人容貌魁岸武敢善射殖產鉅萬好結納邊豪爲長雄隋大業末任金城府校尉會歲凶隴西盜起金城令郝瑗將討賊募兵數千檄舉將始授甲大會置酒舉與子仁果及其黨劫瑗于坐矯稱捕反者即起兵囚郡縣官發粟以賑貧乏自號西秦霸王建元秦興以仁果爲齊公少子仁越爲晉公它賊宗羅睺帥衆下之以爲義興公更招附餘盜剽馬牧兵鋒銳甚所徇皆下隋將皇甫縮兵萬人屯枹罕舉以精卒二千襲之遇於赤岸大風且澍逆舉陣縮不擊俄反風縮屯氣色暄冥部伍錯亂舉介騎先衆乘之縮陣大潰進陷枹罕岷山羌鍾利俗以衆二萬降舉大振進仁果爲齊王東道行軍元帥羅睺爲義興王副之仁越晉王河州刺史因徇下鄯廓二州不闕旬盡有隴西地衆十三萬十三年僭

帝號于蘭州以妻鞠爲后仁杲爲太子即其先墓置陵邑立朝城南陳兵數萬展墓訖大饗使仁杲圍秦州仁越趨劔口掠河池太守蕭瑀拒卻之遣將常仲興度河擊李軌與軌將李斌賁戰昌松仲興敗軍沒於軌仁杲克秦州舉往都之仁杲寇扶風汧源賊唐弼拒不得進初弼立李弘芝爲天子有衆十萬舉遣使招弼弼殺弘芝從舉仁杲間弼無備襲之盡奪其衆弼以數百騎走軍益張號二十萬將窺京師會高祖入關遂留攻扶風秦王擊破之斬首數千級逐北至隴還舉畏王遂踰隴走問其下曰古有降天子乎僞黃門侍郎褚亮曰昔趙佗以南粵歸漢蜀劉禪亦仕晉近世蕭琮其家今存轉禍爲福嘗有之衛尉卿郝瑗曰亮之言非也昔漢祖兵屢敗蜀先主嘗亡其妻子夫戰固有勝負豈可不勝便爲亡國計乎舉亦悔其言乃曰聊試公等即厚賜瑗以爲謀主瑗請連梁師都厚賂突厥合從東向舉從之約突厥莫賀咄設犯京師會都水監宇文歆使突厥歆說止其兵故舉謀塞武德元年豐州摠

管張長慈擊羅睺舉悉兵援之屯析墪以游軍掠岐函秦王禦之
次高墪度舉糧少利速鬪堅壁老其兵會王疾卧屯不出而舉數
挑戰行軍長史劉文靜躬開山觀兵於高墪恃衆不設備舉兵掩
其後遂大敗死者十六大將慕容羅睺李安遠劉弘基皆没王還
京師舉拔高墪仁杲進逼寧州郝瑗謀曰今唐新破將卒禽俘人
心搖矣可乘勝直趨長安舉然之方行而病召巫占視言唐兵爲
祟舉惡之未幾死仁杲代立僞論舉武皇帝未葬而仁杲滅

仁杲多力善騎射軍中號萬人敵性賊悍初舉每破陣軍獲俘仁
杲必斷舌刈鼻或春斮之其妻亦凶暴喜鞭楚人見不勝痛宛轉
於地者則埋其足露腹背受捶人畏而不親仁杲多殺人淫略民
人妻妾嘗得使信子立怒其不降磔之火漸割以啖士拔秦州取
富人倒懸以酢注鼻或杖其隱以求財雖舉殘猛亦惡之每戒曰
汝材略足辦事而傷於虐終覆吾宗及繼立與諸將素有隙者咸
猜懼郝瑗哭舉病不起繇是兵稍衰秦王率諸將復壁高墪諸將

請戰王曰我軍新衄銳氣少賊驟勝而驕有輕我心我閉壁以折之伺衰而擊可一戰禽也因令軍中曰敢言戰者斬久之仁杲糧乏挑戰不許其將牟君才內史令翟長慈以衆降左僕射鍾俱仇以河州降王策賊可破遣將軍龐玉擊宗羅睺於淺水原戰酣王以勁兵擣其背羅睺敗王率騎追奔於是悉軍馳之曰勢破竹不可失也夜半至析城遲明圍合仁杲率僞官屬降王受之以仁杲歸京師及酋黨數十人皆斬之舉父子盜隴西五年滅初仁杲降諸將賀且問曰羅睺雖破而賊城尚堅王能下之何也王曰羅睺健將非急追之使得還城未可取也故吾使賊不及計是以克之諸將咨服仁杲已敗其將勞山地降詔即統其兵未幾復叛山地羌豪也舉父子信倚之至是入南山繇商洛出漢川衆數千所過剽害敗大將龐玉至始州掠王氏女醉寢于野王取山地所佩刀斬之送首梁州詔封女爲崇義夫人

李軌字處則涼州姑臧人略知書有智辯家以財雄邊好調人急

鄉黨稱之隋大業中補鷹揚府司兵薛舉亂金城軌與同郡曹珍
關謹梁碩李贇安脩仁等計曰舉暴悍今其兵必來吏孱怯無足
與計者欲相戮力據河右以觀天下變庸能束手以妻子餌人哉
衆允其謀共舉兵然莫適敢主曹珍曰我聞讖書李氏當王今軌
賢非天啓乎遂共降拜以聽命脩仁夜率諸胡入內苑城建旗大
呼軌集衆應之執虎賁郎將謝統師郡丞韋士政遂自稱河西大
涼王署官屬准開皇故事初突厥曷娑那可汗弟達度闕設內屬
保會寧川至是稱可汗降於軌謹等議盡殺隋官分其產軌曰諸
公旣見推當宣吾約今軍以義興意在救亂殺人取財是爲賊何
以求濟乎迺以統師爲太僕卿士政太府卿會薛舉遣兵來侵軌
遣將敗之昌松斬首二千級悉虜其衆軌縱還之李贇曰今力戰
而俘又縱以資敵不如盡阮之軌曰不然若天命歸我當禽其主
此皆我有也不者徒留何益遂遣之未幾拔張掖燉煌西平枹罕
悉有河西武德元年高祖方事薛舉遣使涼州墜書慰結謂軌爲

從弟軌喜乃遣弟懋入朝帝拜懋大將軍還之詔鴻臚少卿張侯
德持節冊拜軌涼王涼州摠管給羽葆鼓吹一部會軌僭帝號建
元安樂以其子伯玉爲太子長史曹珍爲尚書左僕射攻陷河州
侯德至軌召其下議曰李氏有天下曆運所屬已宅京邑一姓不
可競王今欲去帝號東向受冊可乎曹珍曰隋亡英雄焱起號帝
王者瓜分鼎峙唐自保關雍大涼奄河右業已爲天子柰何受人
官必欲以小事大請行蕭啓故事稱梁帝而臣於周軌從之乃遣
僞尚書左丞鄧曉來朝奉書稱從弟大涼皇帝帝怒曰軌謂朕爲
兄此不臣也囚曉不遣初軌以梁碩爲謀主授吏部尚書碩有筭
略衆憚之嘗見故西域胡種族盛勸軌備之因與戶部尚書安脩
仁文怨又軌子仲琰嘗候碩碩不爲起仲琰憾之乃相與譖碩軌
不察齎鳩其家殺之繇是故人稍疑懼不爲用有胡巫妄曰上帝
將遣玉女從天來遂召兵築臺以候女多所糜損屬荐飢人相食
軌毀家貲賑之不能給議發倉粟曹珍亦勸之謝統師等故隋官

內不附每引結羣胡排其用事臣因是欲離沮其衆乃廷詰珍
曰百姓餓死皆弱不足事者壯勇士終不肯困且儲廩以備不虞
豈宜妄散惠孱小乎僕射苟附下非國計軌曰善乃閉粟下益怨
多欲叛去會脩仁兄興貴本在長安自表詣涼州招軌帝曰軌據
河西連吐谷渾突厥今興兵討擊尚為難單使弄頰可下邪興貴
曰軌盛彊誠然若曉以逆順禍福宜聽如憑固不受臣世涼州豪
望多識其士民而脩仁為軌信任典事樞者數十人若候隙圖之
無不濟帝許之興貴至涼州軌授以左右衛大將軍因間訪興貴
以自安策興貴對曰涼州僻遠財力凋耗雖勝兵十萬而地不過
千里無險固自守又濱接戎狄豺狼也非我族類今唐家據
京師略定中原攻必下戰必勝蓋天啓也若舉河西地奉圖東歸
雖漢竇融未足吾比軌默不荅久之曰昔吳王濞以江左兵猶稱
己為東帝我今舉河右不得為西帝乎雖唐彊大如我何君無為
唐誘致我興貴懼謝曰竊聞富貴不居故鄉如衣錦夜行今合宗

蒙任敢有它志興貴知軌不可以說乃與脩仁等潛引諸胡兵圍其城軌以步騎千餘出戰先是薛舉柱國奚道宜率羌兵奔軌軌許以刺史而不與道宜怨故共擊軌軌敗入城引兵登陴須外援興貴傳言曰唐使我來取軌不從者罪三族於是諸城不敢動軌嘆曰人心去矣天亡我乎携妻子上玉女臺屬酒為別脩仁執送之斬於長安自起至亡凡三年詔興貴為右武侯大將軍封涼國公賜帛萬段脩仁左武侯大將軍申國公並給田宅封六百戶時鄧曉聞軌敗入賀帝帝曰而委質李軌以使來聞其亡不少感乃蹈拊以悅我不盡心於軌能竭節於我乎遂廢不齒

劉武周瀛州景城人父匡徙馬邑母趙嘗夜坐廷中見若雄雞光燭地飛投其懷起振衣無有感而娠生武周武周為人驍悍善騎射喜交豪桀兄山伯嘗嘗辱之曰汝不擇所與必滅吾宗武周因去至洛為大僕楊義臣帳下募征遼有功補建節校尉還馬邑為鷹揚府校尉太守王仁恭以其州里雄頗愛遇之令摠虞候直閤

下父之盜仁恭侍兒懼覺誅又見天下已亂陰有異計因宣言于衆曰今歲饑死者骨相枕於野府君閉倉不卹豈憂百姓意乎以市怒其軍皆憤怨武周知人已搖因稱疾卧家豪桀往候謁遂椎牛縱酒大言曰盜賊方起衆又飢壯士守分死溝壑今官粟紅腐于倉誰能與我共取之諸惡少年皆願從隋大業十三年與其徒張萬歲等十餘人候仁恭視事武周上謁萬歲自後入斬仁恭持首出徇郡中無敢動者遂開倉賑窮絕馳檄蜀城皆下得兵萬餘自稱太守遣使附突厥雁門丞陳孝意虎賁郎將王智辯合兵圍其桑乾鎮奮旻厥至武周與共擊智辯破之孝意奔還雁門雁門人殺之以城歸武周武周因襲破樓煩進據汾陽宮取宮人賧突厥始畢可汗報以馬其衆遂大攻得定襄突厥以狼頭毒蘇立武周爲定揚可汗僭稱皇帝以妻沮爲后建元天興衛士揚伏念爲左僕射姝墜苑君璋爲內史令初上谷賊宋金剛有衆萬餘與魏刀兒連和刀兒爲竇建德所攻金剛救之大敗率餘衆四千保西山建德

招之金剛志曰建德殺魏王吾義不往諸君可以吾首取富貴乃拔刀將自刎衆抱之泣遂與皆歸武周武周素聞金剛善兵得之喜封爲宋王屬以軍分家貨半遺之金剛亦自結出其妻而聘武周妹說武周取晉陽南向爭天下武周授金剛西南道大行臺武德二年摠兵二萬入寇次黃蛇鎮又連突厥鋒無前遂破榆次拔介州進圍太原詔遣太常少卿李仲文禦之爲賊所執舉軍沒仲文逃還賊因破平遥取石州殺刺史王儉略涪州詔右僕射裴寂爲晉州道行軍摠管拒之寂戰敗績齊王元吉委并州遁武周入據之遣金剛攻陷晉州執右驍衛將軍劉弘基進破滄州夏縣人呂崇茂殺其令自號魏王以應賊隋河東守將王行本與武周合關中震動高祖詔秦王督兵進討屯栢壁又詔永安王孝基與于筠獨孤懷恩唐儉等攻夏縣不克軍城南崇茂與賊將尉遲弼德襲破孝基軍四將被執弼德還滄州王邀戰破之於美良川弼德復與別帥尋相援王行本於蒲王又破卻其軍蒲州降帝幸蒲津

關王自栢壁輕騎謁行在金剛遂圍絳州王還屯金剛引退武周
攻李仲文於浩州不勝遣將黃子英護饜道驃騎大將軍張德政
襲斬之虜其衆武周部將稍離金剛以糧道乏卒飢引去王追至
雀鼠谷日中八戰賊皆敗斬級數萬獲輜重千乘金剛走介
州官軍迫之以餘衆二萬出西門背城陣亘七里王令李世勣程
鸞金秦叔寶為北軍翟長孫秦武通為南軍旣戰小卻王以精騎
突擊破之金剛將輕騎去賊將尉遲弼德尋相張萬歲降收其精
兵遂復介州武周引騎五百棄并州北走突厥金剛收散卒將還
拒衆不為用亦以百騎奔突厥并州平河東地盡復未幾金剛背
突厥欲還上谷為其追騎斬之武周亦謀歸馬邑計露突厥殺之
起兵六年而滅

高開道滄州陽信人世煇鹽為生少橋勇走及奔馬隋大業末依
河間賊格謙未甚奇之會謙為隋兵圍捕左右奔散無救者開道
獨身被戰殺數十人捕兵解謙得免遂引為將軍謙滅與其黨百

餘人亡海曲後出剽滄州衆稍附因北掠戎保自臨渝至懷遠皆
破有之復引兵圍北平未下隋守將李景自度不能支拔城去開
道據其地武德元年陷漁陽郡有之有鎧馬數千衆萬人自號燕
王先是懷戎浮屠高曇晟因縣令具供與其徒龍襄殺令偽號大乘
皇帝以尼靜宣爲耶輸皇后建元法輪遣使約開道爲兄弟封齊
王開道引衆從之居三月殺曇晟并其衆復稱燕王建元署置百
官實建德圍羅藝於幽州藝誦救開道以騎二千赴之建德解去
乃因藝使請降詔以爲蔚州摠管上柱國北平郡王賜姓李開道
以輕騎五百抵幽州欲圖藝自從數騎入都督府且觀藝藝與張
飲盡歡知不可圖遂去五年幽州饑開道許輸以粟藝遣老弱湊
食皆厚遇之藝悅不爲虞更發兵三千車數百馬驢千往請粟開
道悉留不遣遂北連突厥告絕於藝復稱燕與劉黑闥聯兵入寇
開道攻易州不克遣將謝稜詭降於藝請兵應接藝衆至稜縱擊
破之因道突厥俱南恒定幽易等騷然罹患頡利以開道善攻具

與俱攻馬邑拔之時羣盜相繼平開道欲降自疑反覆得罪猶恃
突厥自安然將士多山東人思歸衆益厭亂初開道募壯士數百
爲養子衛閤下及劉黑闥將張君立亡歸開道命與愛將張金樹
分督之金樹潛令左右數人僞與諸養子戲至夕入閤絕其弓弦
又取刀稍聚牀下既暝金樹以其徒譟攻之數人者抱刀稍出閤
諸養子將搏戰亡弓稍君立舉火外城應之帳下大擾養子窮爭
歸金樹開道顧不免探甲挺刃據堂坐與妻妾奏妓飲酒金樹畏
不敢前天且明開道先縊其妻妾及諸子而後自殺金樹羅兵取
養子皆斬之亦殺君立而歸開道起兵凡八年滅以其地爲媯州
詔以金樹爲北燕州都督

劉黑闥貝州漳南人嗜酒喜蒲博不治產亡賴父兄患苦之與竇
建德少相友建德每資其費黑闥所得輒盡建德亦弗之計隋末
亡命從郝孝德爲盜後事李密爲裨將密敗王世充虜之以其武
健補馬軍摠管鎮新鄉時李世勣陷於竇建德建德使攻新鄉虜

黑闥獻之建德用為將封漢東郡公黑闥與諸盜游素彊武多狙詐建德有所經略常委以斤候陰入敵中胡虛實每乘隙奮奇兵出不意多所摧克軍中號為神勇武德四年建德敗還匿漳南杜門不出會高祖召建德故將范願董康買曹湛高雅賢將用之願等疑畏謀曰王世充舉洛陽降驍將楊公卿單雄信之徒皆夷滅今召吾等若西入關必無全且夏王於唐固有德往禽淮安王同安公主皆厚遣還之今唐得夏王即加害我不以餘生為王復讎無以見天下義士於是謀反卜所主劉氏吉共往見故將劉雅告之雅不從眾怒殺雅去范願曰漢東公黑闥果敢多奇略寬仁容眾恩結士卒吾嘗聞劉氏當王今欲收夏王亡眾集大事非其人莫可乃之漳南謁黑闥以告黑闥喜椎牛饗士得兵百餘人襲漳南縣破之貝州刺史戴元祥魏州刺史權威合執討擊元祥等皆敗死收其器械有眾千人建德故時左右稍歸之兵寔盛乃設壇漳南祭建德告以舉兵意自稱大將軍陷歷亭殺守將王行敏饒

陽賊崔元遜攻陷深州殺刺史裴晞應之兗州賊徐圓朗亦相連和遂取瀛州攻定州殘之乃移檄趙魏建德將吏往往殺令尉附賊北連高開道勢雄張進至宗城衆數萬黎州總管李世勣戰敗走洛州黑闥追之步卒五千皆覆世勣挺身免乃以王琮爲中書令劉斌爲中書侍郎遣使北結突厥頡利頡利遣侯斤宋邪那率騎從之軍大振不半年盡有建德故地高祖詔秦王及齊王元吉討之五年黑闥陷相州號漢東王建元天造以范願爲左僕射董康買兵部尚書高雅賢爲左領軍王小胡爲右領軍召建德僚屬悉復用之都洛州秦王率兵次汲數困賊進下相州棣州人復殺刺史叛歸黑闥二月秦王破之于列人取洛水使摠管羅士信守之黑闥攻陷洛水士信死王阻水爲連營分奇兵絕其餽路黑闥數挑戰堅壁不爲動三月賊糧盡王度必決戰豫壅洛水上流敕吏曰頃賊度亟決之黑闥果率騎二萬絕水陣與王師大戰衆潰水暴至賊衆不得還斬首萬餘級溺死數千黑闥與范願等以殘騎

奔突厥山東平秦王還黑闥藉突厥兵復入寇攻定州舊將曹該
董康買先逃鮮虞聚兵應之帝以淮陽王道玄爲河北摠管與原
國公史萬寶討賊戰下博敗績道玄死于陣萬寶輕騎逸繇是河
北復叛歸賊黑闥仍都洺州九月略瀛州殺刺史詔齊王元吉擊
之不進又詔皇太子督兵并力頻戰皆捷十二月皇太子齊王悉
兵戰館陶黑闥大敗引軍走躡北至毛州黑闥整衆背永濟渠陣
縱騎搏之賊赴水死者數千黑闥遁去騎將劉弘基追感賊不得
休明年正月馳至饒陽騎能屬者纔百餘困且餒黑闥所署摠管
崔元遜迎拜延之入黑闥不許元遜固請且泣乃進城下元遜饋
之方飯車騎諸葛德威勒兵前黑闥罵曰狗輩負我遂執詣皇太
子所斬之德威舉郡降山東遂定餘黨及突厥兵間道亡定州摠
管雙士洛邀戰破平之初秦王建天策府其弧矢制倍於常逐黑
闥也爲突厥所窘自以大笥前射卻之突厥得箭傳觀以爲神後餘
大弓一長矢五藏之武庫世寶之毋郊丘重禮必陳于儀物之首

以識武功云

徐圓郎者兗州人隋末爲盜據本郡以兵徇琅邪以西北至東平盡有之勝兵二萬附李密密敗歸竇建德山東平授兗州摠管魯郡公高祖遣葛國公盛彥師安輯河南抵任城會黑闥兵起圓郎執彥師應之自號魯王黑闥以爲大行臺元帥兗鄆陳杞伊洛曹戴等州豪桀皆殺吏應賊秦王已破黑闥遣兵屯濟陰經略之圓郎懼河間人劉復禮說圓郎曰彭城有劉世徹才略不常有異相士大夫許其必王將軍欲自用恐敗不如迎世徹立之功無不濟圓郎謂然乃迎之盛彥師以世徹若聯叛禍且不解即謬說曰聞公迎劉世徹信乎公亡無日矣獨不見翟讓用李密哉圓郎信之世徹至奪其兵以爲司馬遣徇地所至皆下忌而殺之會淮安王神通李世勣合兵攻圓郎數敗摠管任瓌遂圍兗州降者爭踰城圓郎窮棄城與下數騎夜亡爲野人所殺

薛李三劉高列傳第十一

[The main body of the page contains a large rectangular frame with vertical lines, which is currently empty of text.]

蕭輔沈李梁列傳第十二

唐書八十七

端明殿學士翰林侍讀學士龍圖閣學士朝請李守尚書吏部侍郎充集賢殿脩撰臣宋祁奉
敕撰

蕭銑後梁宣帝曾孫也祖巖開皇初叛隋降陳陳亡文帝誅之銑少貧傭書事母孝煬帝以外戚擢為羅川令大業十三年岳州校尉董景珍雷世猛旅帥鄭文秀許玄徹萬瓚徐德基郭華沔人張繡等謀反隋且推景珍為主景珍曰吾素微雖假名號衆不厭羅川令故梁裔也寬仁大度有武皇遺風且吾聞帝王之興必有符命隋冠帶悉號起梁蕭氏中興象也今推之以應天順人不亦可乎乃遣人告銑銑即報景珍書曰我先君昔事隋職貢無廢乃貧我土宇滅我宗祊我是以痾心疾首思刷厥恥今天誘乃衷公等降心將大復梁緒徼福于先帝吾敢不糾厲士衆以從公哉即募兵數千揚言跡盜將以應景珍會潁川賊沈柳生寇縣銑出戰不利謂其下曰岳陽豪桀將推我為主今天下叛隋吾能守節獨完

唐書列傳十一
哉且吾先人國于此若徇其請復梁祚因以半紙檄召羣盜誰敢
不從衆悅乃以十月稱梁公旂幟服色悉用其舊柳生以衆歸銑
用爲車騎大將軍不五日遠近爭附衆數萬乃趨巴陵景珍遣徐
德基郭華率彊姓數百迎謁而先見柳生柳生與其下謀曰梁公
起我最先附勲第一今岳陽兵衆而位多誰肯爲我下不如殺德
基質其人獨挾梁主以進則吾誰先因殺德基詣中軍白銑銑驚
曰今欲撥亂遽自相屠我不能爲若主矣步出軍門柳生懼伏地
請罪銑責宥之陳兵而進景珍曰德基倡義竭誠柳生擅殺之不
誅無以爲政且凶賊與共處必爲亂銑因斬柳生於是築壇城南
柴上帝自稱梁王有異鳥至建元爲鳳鳴義寧二年僭稱皇帝署
百官一用梁故事追諡從父琮爲孝靖帝祖巖河間忠烈王父璿
文憲王封景珍晉王雷世猛秦王鄭文秀楚王許玄徹燕王萬瓚
魯王張繡齊王楊道生宋王隋將張鎮州王仁壽擊銑不能克及
隋二乃與恣冉長眞等率嶺南州縣降於銑時林士弘據江南銑

遣將蘇胡兒拔豫章使楊道生取南郡張繡略定嶺表西至三峽
南交趾北距漢水皆附屬勝兵四十萬武德元年徙都江陵復園
廟引岑文本爲中書侍郎掌機密遣道生攻峽州刺史許紹擊破
之士死過半三年高祖詔夔州總管趙郡王孝恭討之拔通開二
州斬僞東平王闡提諸將擅兵橫恣銑恐寢不制乃陽議休兵營
農以黜其權大司馬董景珍之弟爲將軍怨之謀作亂事泄被誅
景珍方鎮長沙銑下書赦之召還江陵景珍懼遣使詣孝恭舉地
降銑遣張繡攻景珍景珍曰前年醢彭越往年殺韓信獨不見乎
柰何相攻繡不荅圍之景珍潰而走麾下殺之銑進繡爲尚書令
繡恃功亦驕蹇銑又誅之銑性外寬內忌疾勝己者於是大臣舊
將皆疑間多叛去銑不能禁由此愈弱四年詔孝恭與李靖率巴
蜀兵順流下廬江王瑗繇襄陽道黔州刺史田世康出辰州道會
兵圖銑僞將周法明以四州降即詔爲黃州總管趨夏口道攻安
州克之僞將雷長穎以魯山降銑乃遣將文士弘拒孝恭戰清江

口孝恭大破之獲鬪艦千艘拔宜昌當陽枝江松滋僞江州將蓋
彥舉以城降孝恭靖直逼其都初銑放兵止留宿衛數千人及
倉卒追集江嶺回遠未及赴孝恭布長圍守之數日破其水城取
樓船數千交州摠管丘和長史高士廉司馬杜之松詣靖降銑度
救不至謂其下曰天不祚梁乎待窮而下必害百姓今城未拔先
出降可免亂諸人何患無君乃麾而令守陴者皆慟以太牢告于
廟率官屬縋衰布幘詣軍門謝曰當死者銑爾百姓非罪也請
無殺掠孝恭受之護送京師後數日救兵至且十餘萬知銑降乃
送款銑至高祖讓之對曰隋失其鹿英雄競逐銑無天命故爲陛
下禽猶田橫南面豈負漢哉帝怒其不屈詔斬都市年三十九自
僭國至滅凡五年

贊曰銑故梁子孫起文吏掩東南而有之荆楚好亂氣俗然也
觀銑武雖不足文有餘矣大抵盜仁義詭世亂俗者聖人所必誅
若銑力困計殫以好言自釋於下係虜在廷抗辭不屈僞辯易窮

卒以殊死高祖聖矣哉

輔公柘齊州臨濟人隋季與鄉人杜伏威爲盜轉掠淮南伏威兵
寢盛自號摠管以公柘爲長史賊李子通據江都伏威使公柘以
精卒數千度江擊之子通拒戰衆十倍銳甚公柘選甲士千人操
長刀居前別以千人隨之令曰卻者斬公柘以衆殿俄而子通方
陣而進長刀千人皆決死鬪公柘縱左右翼搏之子通大潰降其
衆數千伏威旣遣使歸國武德二年詔授公柘淮南道行臺尚書
左僕射封舒國公初伏威與公柘少相愛又兄事之故軍中呼輔
伯尊禮略等伏威稍已之心乃署養子闕稜爲左將軍王雄誕爲
右將軍推公柘爲僕射陰解其柄公柘內怏怏不平乃與故人左
游仙僞學辟穀以自晦六年伏威入朝留公柘居守復令雄誕握
兵副之陰誡曰吾至京不失職無容公柘爲變後左游仙說公柘
反會雄誕以疾臥家公柘奪其兵給言伏威移書令舉事八月遂
僭位國稱宋即陳故宮都之殺王雄誕署百官以左游仙爲兵部

尚書東南道大使越州摠管增脩器械轉廩食遣將徐紹宗侵
海州陳正通寇壽陽詔趙郡王孝恭趨九江嶺南大使李靖下宣
城懷州摠管黃君漢出譙齊州摠管李世勣繇淮泗討之孝恭取
蕪湖下梁山三鎮河南安撫大使任瓌拔揚子城降僞將龍龔遂
據揚州公祐復遣將馮惠亮陳當世屯博望山陳正通徐紹宗屯
青州山以拒戰孝恭率諸將破之惠亮正通走李靖躡追百餘里
衆悉潰正通等以五百騎奔丹楊公祐懼棄城奔左游仙於會稽
兵尚數萬夜至毗陵能從者裁五百僞將吳騷孫安謀執之公祐
棄妻子斬關遁與腹心士數十抵武康野人執送丹楊孝恭斬之
傳首京師始公祐佐伏威起據江東距公祐死凡十三年

沈法興湖州武康人父恪陳廣州刺史法興隋大業末爲吳興郡
守東陽賊樓世幹略其郡煬帝詔與太僕丞元祐討之義寧二年
江都亂法興自以世南土屬姓數千家遠近嚮服乃與祐將孫士
漢陳果仁執祐名誅字文化及三月發東陽行收兵趨江都下餘

杭比至烏程衆六萬毗陵通守路道德拒之法興約連和因襲殺之據其城遂定江表十餘州自署江南道摠管聞越王侗立乃上書稱大司馬錄尚書事天門公承制置百官以陳果仁爲司徒孫士漢司空蔣元超尚書左僕射殷芊左丞徐令言右丞劉子翼選部侍郎李百藥爲掾後聞侗被廢高祖武德二年稱梁王建元爲延康易隋官儀頗用陳氏故事法興自意南方諸城可跂而平專事威戮下有細過即誅之繇是將士攜解俄遣子倫救陳稜擊李子通反爲所敗子通乘鋒度江破京口使將蔣元超戰慶亭大敗死之法興懼棄城與左右數百投吳郡賊聞人嗣安嗣安遣將葉孝辯迎之法興中悔將殺孝辯趨會稽爲所覺懼自沈於江起義寧至武德凡三年滅

李子通沂州承人少貧以漁獵爲生居其鄉見班白負戴必代之家有餘則以賙人而喜報仇隋大業末長白山賊左才相自號博山公子通依之以武力雄其間鄉人有陷賊者子通專經護之方

是時羣盜暴忍獨子通仁愛歸者遂多不半歲有徒萬人才相
畏忌子通乃引衆度淮與杜伏威合爲隋將來整所破奔海陵得
衆二萬自稱將軍大業十一年僭號楚王宇文化及殺煬帝以右
禦衛將軍陳稜爲江都太守已而稜降高祖授以摠管即守其郡
子通攻稜稜窮乞師於沈法興杜伏威伏威自將屯清沔法興遣
子綸屯揚子間數十里子通納言毛文深請募吳人詐爲法興兵
夜襲伏威二人遂交惡無敢先戰者子通得悉力取江都遂據之
稜奔而免子通僭即皇帝位國號吳建元明政齊賊樂伯通先爲
化及守丹楊即以衆萬餘降之子通用爲尚書左僕射又敗法興
兵遂取晉陵以法興所署掾李百藥爲內史侍郎典文檄尚書左
丞殷芊爲太常卿司禮樂繇是江南士人多歸之會伏威命輔公
柘拔丹楊進屯溧水子通戰敗糧且盡棄江都保京口伏威盡得
其地俄東走太湖哀散兵二萬人復張襲法興吳郡破之據餘杭
東舉會稽南距嶺西抵宣城北太湖悉有之武德四年伏威遣將

王雄誕討子通戰蘇州敗績退保餘杭雄誕進傅城子通窮乃降
伏威受之并樂伯通送京師高祖薄其罪賜宅一區田五頃賚子
頗厚及伏威來朝子通語伯通曰東南未靖而伏威來我故兵多
在江外若收之可建大功遂皆亡及藍田爲關吏所獲並伏誅方
子通等僭盛時復有朱粲林士弘張善安亦竊名號於淮楚間
朱粲亳州城父人初爲縣史大業中從軍伐賊長白山亡命去爲
盜號可達寒賊自稱迦樓羅王衆十萬度淮屠晉陵泗陽轉剽
山南所至殘戮無遺噍僭號楚帝建元爲昌達攻拔南陽義寧末
與山南撫慰使馬元規戰冠軍大敗收餘衆復振至二萬粲所
克州縣皆發藏粟以食遷徙無常去輒燔燬聚毀城郭不務稼穡
專以劫爲資於是人大餓死者係路其軍亦匱乃掠小兒烝食之
戒其徒曰味之珍寧有加人者弟使佗國有人我卹無儲哉勒所
部略婦人孺兒分烹之又稅諸城細弱以益糧隋著作佐郎陸從
典通事舍人顏愍楚謫南陽粲初引爲賓客後盡食兩家俄而

諸城懼皆逃散顯州首領楊士林田瓚起兵攻粲旁郡響響應戰淮源粲大敗挈殘士奔菊潭遣使乞降高祖以前御史大夫段確假散騎常侍勞之確醉戲粲曰君膾人多矣若為味粲曰噉嗜酒人正似糟豚確恚罵曰狂賊歸朝乃一奴耳復得噉人乎粲懼收確于坐并從者數十悉饗之以饗左右遂屠菊潭奔王世充署龍驤大將軍東都平斬洛水上士庶競擲瓦礫擊其尸須臾若冢林士弘饒州都陽人隋季與鄉人操師乞起為盜師乞自號元興王建元天成大業十二年據豫章以士弘為大將軍隋遣治書侍御史劉子翊討賊射殺師乞而士弘收其眾復戰彭蠡子翊敗死之遂大振眾十餘萬據虔州自號南越王俄僭號楚稱皇帝建元為太平侍御史鄭大節以九江郡下之士弘任其黨王戎為司空臨川廬陵南康宜春豪桀皆殺隋守令以附北盡九江南番禺悉有之後蕭銑以舟師破豫章士弘獨有南昌虔循潮之地銑敗其亡卒稍歸之復振趙郡王孝恭招慰降循潮二州武德五年士弘

弟鄱陽王藥師以兵二萬圍循州摠管楊世略破斬之士弘請降
王戎亦獻南昌地詔戎爲南昌州摠管士弘復遁保安城山誘潰
亡謀復亂素人相聚應之爲張善安所察以兵赴討會士弘死其
黨乃解

張善安兗州方與人年十七亡命爲盜轉掠淮南會子孟讓敗得其
散卒八百襲破廬江郡依林士弘不見信憾之反襲士弘焚其郭
去保南康蕭銑取豫章遣將蘇胡兒守之善安奪其地據以歸
國授洪州摠管武德六年反輔公柝以爲西南道大行臺善安掠
孫州執摠管王戎襲殺黃州摠管周法明會李大亮兵至爲開曉
禍福荅曰善安初不反爲部下誑誤降今易耳恐不免柝何大亮
曰摠管定降吾固不疑因獨入其陣與善安握手語乃大喜將數
十騎詣大亮營大亮引入命壯士執之駟比日驚引去悉兵來戰大
亮諭以善安自歸無庸鬪其黨罵曰摠管賣我遂潰送善安京
師稱不與公柝謀高祖赦之公柝破得其書遂伏誅

梁師都夏州朔方人爲郡豪姓仕隋鷹揚府郎將大業末罷歸結徒起爲盜殺郡丞唐世宗據郡稱大丞相聯兵突厥與隋將張世隆戰敗之因略定雕陰弘化延安自爲梁國僭皇帝位祭天於城南坎地瘞玉得印以爲瑞建元永隆始畢可汗遣以狼頭纛號大度毗伽可汗解事天子遂導突厥兵居河南地拔鹽川郡武德二年寇靈州長史楊則擊走之又與突厥千騎營野豬嶺延州揔管段德操勒兵不戰師都氣懈遣兵進擊戰酣德操自以輕騎出其旁乘之師都大潰逐北二百里俘馘甚衆未幾以步騎五千入寇德操又盡屠其軍降堡將張舉劉昊師都懼遣尚書陸季覽說處羅可汗曰隋亡中國裂爲四五勢均力弱皆爭附突厥今唐滅劉武周國益大兵方四出師都將朝夕亡然次亦及突厥願可汗如魏孝文兵引而南師都請爲鄉道處羅納之令莫賀咄設入五原泥步設與師都趨延州處羅自攻太原突利可汗與奚靺契丹靺鞨繇幽州道合竇建德自盜口會晉絳已而處羅死兵不出又

爲德操所破六年其將賀遂索周以所部十二州降德操悉兵攻之拔東城師都保西城不敢出求救於突厥頡利頡利以勁兵萬騎赴之先是稽胡大帥劉金山成以衆附師都因讒見殺其下疑懼乃多叛師都日益蹙遂往朝頡利教使南略故突厥盜邊無寧歲遂窺渭橋後突厥政亂太宗以師都寢危乃諭以書使歸不從詔夏州長史劉旻司馬劉蘭經略之獲生口縱以爲間君臣離燒出輕騎蹂其稼城中飢虛又天狗墮其城辛獠兒李正寶馮端皆其健將謀執師都降不果正寶挺身歸貞觀二年旻蘭表可取狀詔柴紹薛萬均併力令旻以勁卒直據朔方東城頡利來援會大雪羊馬死紹逆戰破之進屯城下其從父弟洛仁斬師都降擢洛仁爲右驍衛將軍朔方郡公自起至滅十二年以其地爲夏州始師都據郡時劉季真郭子和者亦俱起子和自有傳

劉季真離石胡人父龍兒大業十年舉兵自稱王以季真爲太子第六兒爲永安王鋒甚銳將軍潘長文連年擊不能下後虎賁郎

將梁德破殺龍兒衆乃散唐兵起六兒復聚爲盜附劉武周季
眞從之自號太子王六兒爲拓定王迭爲邊害西河公張綸具鄉
公李仲文合兵討之季眞降詔以爲石州摠管賜姓李封壺山郡
王宋金剛戰滄州勢未決遂復連武周及敗秦王執六兒斬之季
眞奔高滿政俄被殺

蕭輔沈李梁列傳第十二

劉裴列傳第十三

唐書八十八

龍殿學士翰林待讀學士龍圖閣學士朝請李在尚書吏部侍郎充集賢殿脩撰皇宋初奉
敕撰

劉文靜字肇仁自言系出彭城世居京兆武功父韶仕隋戰死贈
上儀同三司文靜以死難子襲儀同侗儻有器略大業末爲晉陽
令與晉陽宮監裴寂善寂夜見邏堞傳烽叱曰天下方亂吾將安
舍文靜笑曰如君言豪英所資也吾二人者可終羈賤乎高祖爲
唐公鎮太原文靜察有大志深自結旣又見秦王謂寂曰唐公子
非常人也豁達神武漢高帝魏太祖之徒歟殆天啓之也寂未謂
然文靜俄坐李密姻屬繫獄秦王顧它無可與計者私入視之文
靜喜挑言曰喪亂方剌非湯武高光不能定王曰安知無其人哉
今過此非兒女子媁媁相憂者世道將革直欲共大計試爲我言
之文靜曰上南幸兵填河洛盜賊蜂結大連州縣小阻山澤以萬
數頽眞主取而用之誠能投天會機奮襟大呼則四海不足定也

今汾晉避盜者皆在文靜素知其豪桀一朝號召十萬衆可得也
加公府兵數萬下令誰不願從鼓而入關以震天下王業成矣
王笑曰君言正與我意合乃陰部署賓客將發恐唐公不從文靜
謀因裴寂開說於是介寂以交王遂得進議及突厥敗高君雅兵
唐公被劾王遣文靜寂共說曰公據嫌疑之地勢不圖全今部將
敗方以罪見收事急矣尚不爲計乎晉陽士健馬彊官庫饒曲吳
事可舉也今關中空虛代王弱賢豪輩興未有適歸願公引兵西
誅暴除亂乃受單使囚乎唐公私可會得釋而止王教文靜僞爲
詔發太原西河鴈門馬邑男子年二十至五十悉爲兵期歲盡集
涿郡以伐遼繇是人心愁擾益思亂文靜謂寂曰公聞先發制人
後發制於人乎唐公名載圖讖聞天下尚可怙怙以待禍哉又脅
寂曰公爲監以宮人侍客公死何滅奈何累唐公寂懼乃勸起兵
秦王即委文靜長孫順德等募士聲討劉武周文靜與寂作符敕
發宮監庫物佐軍興會王威高君雅猜貳文靜與劉政會爲急變

書詣留守告二人反候唐公與威君雅視事文靜進曰有密牒言反者公曰威等省牒政會不肯曰所告乃副留守唯唐公得觀公驚曰詎有是乎讀已語威曰人告公等信乎君雅詎曰反人欲殺我耳文靜叱左右執之由是舉兵唐公乃開大將軍府以文靜爲司馬文靜勸改旗幟彰特興又請與突厥連和唐公從之遣文靜使始畢可汗始畢曰唐公兵何事而起文靜曰先帝廢冢嗣以授後主故大亂唐公國近戚懼毀王室起兵黜不當立者願與突厥共定京師金幣子女盡以歸可汗始畢大喜即遣二千騎隨文靜至又獻馬千匹公喜曰非君何以致之尋拒屈突通於潼關與其將桑顯和苦鬪死者數千文靜度顯和軍怠以奇兵從後掩之顯和敗績通兵尚數萬欲引而東文靜命將追執之徇新安以西皆下轉大丞相府司馬進光祿大夫魯國公唐公踐天子位擢納言時多引貴臣共搆文靜諫曰今率土莫不臣而延見羣下三言尚稱名帝坐嚴尊屈與臣子均席此王道所謂太陽俯同萬物者也

帝曰我雖應天受命宿昔之好何可忘公其無嫌薛舉寇涇州以
元帥府長史與司馬殷開山出戰大敗奔還京師坐除名與討仁
果平之復爵邑授民部尚書陝東道行臺左僕射從秦王鎮長
春宮文靜自以材能過裴寂遠甚又屢有軍功而寂獨用故舊恩
居其上意不平每論政多戾駭遂有隙嘗與弟散騎常侍文起飲
酣有怨言拔刀擊柱曰當斬寂會家數有怪文起憂乃召巫夜被
髮銜刀為襮厭文靜妾失愛告其兄上變遂下吏帝遣裴寂蕭蕭
瑀訊狀對曰昔在大將軍府司馬與長史略等今寂已僕射居甲
第寵賚不貲臣官賞等衆人家無贏誠不能無少望帝曰文靜此
言反明甚李綱蕭瑀明其不反秦王亦以文靜首決非常計事成
乃告寂今任遇弗等故怨望非敢反宜賜全宥帝素跡忌之寂又
言文靜多權詭而性猜險忿不顧難醜言怪節已暴驗今天下未
靖恐為後憂帝遂殺之年五十二文起亦死籍其家文靜臨刑撫
膺曰高鳥盡良弓藏果不妄貞觀三年追復官爵以子樹義襲

魯國公詔尚主然怨父不得死謀反誅

裴寂字老且蒲州桑泉人幼孤兄鞠之年十四補郡主簿及長偉容貌涉知書傳隋開皇中調左親衛家貧徒步走京師過華山祠祈神自卜夜夢老人謂曰君年踰四十當貴大業中爲齊州司戶參軍歷侍御史晉陽宮副監唐公雅與厚及留守太原契分愈密至蒲酒通晝夜秦王與劉文静方建大計未敢白公以寂最厚善乃出私錢數百萬餉龍山令高斌廉俾與寂博陽不勝寂得進多大喜曰茲昵太宗以情告之許諾寂嘗以宮人侍唐公恐事發誅閒飲酣乃白秦王將舉兵狀因言今盜徧天下城闔外即戰場雖徇小節猶不脫死若舉義師不特免禍且就大功唐公然所計兵起寂進宮女五百米九百萬斛雜綵五萬段鎧四十萬首大將軍府建爲長史下臨汾封聞喜縣公至河東屈突通未下而三輔豪傑多歸者唐公欲先取京師恐通倚其後猶豫未決寂說曰今通據蒲關未下而西我腹背支敵敗之符也不若破通而後趨京

師秦王曰不然兵尚權權利於速今乘機度河以奪其心且關中羣盜剽處屯結疑力相杖易以招懷撫而有之衆附兵彊何向不克通自守賊耳庸能患我一失其機勝負未可計也唐公兩從之留兵圍蒲而遣秦王入關長安平賜寂田千頃甲第二區物四萬段遷大丞相府長史進魏國公邑三百戶隋帝禪位公固讓寂開陳符命以勸又督太常具儀撰日唐公即位曰使我至此者公也拜尚書右僕射賜服玩不貲詔尚食日給御膳視朝必引與同坐入閣則延卧內言無不從呼爲裴監不名也貴震當世武德二年劉武周寇太原守將數困寂請行授晉州道行軍摠管討賊以便宜使事賊將宋金剛據介州寂屯度索原賊埭水上流寂徙屯爲賊所搏兵大潰死亡略盡寂晝夜馳抵平陽鎮戎皆沒上書謝罪高祖薄其過下詔慰諭俾留撫河東寂無它才惟飛檄郡縣促入屯壘相保贅焚積聚人益喘駭思亂夏人呂崇茂殺其令反爲賊守寂攻之復爲所敗召還帝責讓良久以屬吏俄釋之遇

待如初帝每巡幸必委以居守麟州刺史韋雲起告寂反按訊無狀帝謂曰朕有天下公推轂成之也容有貳哉所以訊吏欲天下人信公不反耳詔三貴妃齋王食寶器宴其家經宿去帝嘗從容夸語曰前王多興細微閒關行陣而後成功我家隴西舊族世姻婭帝室一呼唱義不三月有天下公復華胄職官光顯非劉季亭長蕭曹刀筆吏比也我與公無媿焉四年改鑄錢賜一鑪得自鑄又聘其女爲趙王元景妃遷左僕射帝置酒含章殿歡甚寂頓首曰始陛下發太原約天下已定許上印綬今四海安妥願賜骸骨歸田里帝泣下曰未也要當相與老爾公爲宗臣我爲太上皇逍遙晚歲不亦善乎九年冊拜司空遣尚書負外郎日一人直第貞觀初太宗親郊命寂與長孫无忌升金輅寂辭帝曰公有佐命勲无忌宣力王室非二人誰可參乘者遂同載歸浮屠法雅坐詆言辭連寂坐免官削封邑半歸故郡寂請留京師帝讓曰公勲不稱位徒以恩澤居第一武德之政間或弛紊職公爲之今歸掃墳

墓尚何辭寂遂歸未幾汾陰狂男子謂寂奴曰公有天分監奴白
寂寂惶懼不敢聞遣監奴殺所言者奴盜寂封邑錢百萬寂捕
急遂上變帝怒曰寂有死罪四爲三公與妖人游一也既免官乃
恚稱國家之興皆其所謀二也匿妖人言不奏三也專殺以滅口四也
我戮之非無辭議者多請貸乃放靜州會山羌反或言劫寂爲主
帝曰國家於寂有恩必不爾既而寂率家僮破賊帝念寂功詔
入朝會卒年六十贈相州刺史工部尚書河東郡公子律師嗣尚
臨海長公主終汴州刺史律師子承先武后時爲殺中監酷吏殺
之始高祖論太原首功詔尚書令秦王尚書左僕射裴寂納言劉
文靜恕二死左驍衛大將軍長孫順德右驍衛大將軍劉弘基右
屯衛大將軍竇琮左翊衛大將軍柴紹內史侍郎唐儉吏部侍郎
殷開山鴻臚卿劉世龍衛尉少卿劉政會都水監趙文恪庫部郎
中武士護驃騎將軍張平高李思行李高遷左屯衛府長史許
世緒等十四人恕二死武德九年十月太宗又定功臣封三時文靜

已死乃自寂而下差功大小第之摠四十三人寂戶千五百長孫
无忌王君廓尉遲彥德房玄齡杜如晦戶千三百長孫順德柴紹
羅藝趙郡王孝恭戶千二百侯君集張公謹劉師立戶千李勣劉
弘基戶九百高士廉宇文士及秦叔寶程知節戶七百安興貴安
脩仁唐儉竇軌屈突通蕭瑀封德彝劉義節戶六百錢九隴樊
興公孫武達李孟嘗段志立龐卿憚張亮李藥師杜淹元仲文戶
四百張長遜張平高李安遠李子和秦行師馬三寶戶三百寂等
三十人已見於傳自趙文恪等十八人功不甚顯然參附義始事
班班見當世今次第其名摠出左方云趙文恪并州人爲隋鷹揚
府司馬義兵起授右三統軍武德二年擢都水監封新興郡公時
中國經大亂馬秣會突厥講和詔文恪至并州與齊王誘市邊馬
以備軍劉武周寇太原屬城盡沒李仲文守涪州兵力孤絕齊王
使文恪率步騎千餘助守會太原陷遂棄城遁詔下獄死
李思行趙州人避仇太原唐公將起使覘詗長安還具論機策以

贊大議授左三統軍從破霍邑平京師擢累嘉州刺史樂安郡公卒贈洪州都督諡曰襄

李高遷岐州人客太原唐公引致左右執高君雅等有功以右三統軍從下霍邑圍長安戰力遷左武衛大將軍江夏郡公檢校西麟州刺史突厥寇馬邑高滿政請救詔高遷督兵助守賊盛乃夜斬關走所將皆沒坐除名徙邊後歷資州刺史卒贈涼州都督姜寶誼秦州上邽人父遠仕周爲秦州刺史朝邑縣公寶誼游太學受書業不進去爲左翊衛以積勞遷鷹揚郎將領府兵從高祖督盜太原及起兵授左統軍下西河霍邑以多爵累永安縣公歷右武衛大將軍劉武周使黃子英數盜雀鼠谷帝遣寶誼擊之賊輕甲挑師戰接而三遁逐之伏發寶誼爲賊執俄亡歸與裴寂拒宋金剛戰汾州兵合寂弃軍走寶誼復爲所禽帝聞爲泣下曰彼烈士必不下賊死矣賜其家物千段米三百斛果謀還被害且死西向大呼曰臣無狀負陛下賊平詔迎其柩贈左衛大將軍幽

州摠管諡曰剛子協字壽善篆籀歷燕然都護夏州都督封成
紀縣侯諡曰威

許世緒并州人隋鷹揚府司馬知隋將亡請唐公曰天輔德人與
能乘機不發後必蹈悔隋政不綱天下搖亂公姓名已著誣錄今
孽五郡之兵據四戰之衝苟無竒計禍不反踵若收取英俊爲天
下倡帝王業也公竒之顧倚親密兵起授右二府司馬累除蔡州
刺史真定郡公卒弟洛仁亦從起晉陽錄功至冠軍大將軍卒贈
代州都督諡曰勇陪葬昭陵

劉師立宋州虞城人始事王世充爲親將洛陽平當誅秦王壯其
才釋不死引爲左親衛建成之豐師立參奉密議後與尉遲敬德
龐卿暉李子宜嘗等九人錄功拜左衛率遷左驍衛將軍襄武郡
公賜絹五千匹有告師立姓在符讖欲反者太宗謂曰人言卿將
反果乎師立對曰臣爲隋官不過六品材驚下不敢希富貴今
遭非常之命自位將軍顧已極矣何敢反帝笑曰朕知妄耳賜束帛

召入卧内慰勉羅藝反京師震駭詔師立檢校右武侯大將軍勒兵備非常藝平有司劾黨與師立坐與善除名尋以藩邸舊檢校岐州都督上書請討吐谷渾未報即遣使問諭部落多降附者列其地為開橋二州又党項酋拓拔赤辭先附吐谷渾倚險自守亦遣說下之詔赤辭為西戎州都督師立以母喪解岐人表留遂不得赴哀時河西党項破丑氏嘗苦邊又阻新附師立討之軍未至破丑懼遁去師立窮追之抵岷于真山而還又戰吐谷渾於小莫明川破之轉始州刺史卒諡曰肅

劉義節并州人隋大業末補晉陽鄉長富於財裴寂薦之唐公又與王威高君雅游然於唐公為最厚兵將起威君雅疑之義節刺知其情得先事禽威等從平京師為鴻臚卿時傾府庫為軍賞帑財大乏義節曰今京師屯兵多樵貴帛賤若伐街苑樹為薪以易布帛歲數十萬可致又請軸舒藏内見繒取美尺補雜費得十餘萬段調度遂給遷太府封葛國公義節本名世龍或言世

龍子名鳳昌父子非人臣兆高祖不聽更賜今名貞觀初轉少府
監坐貴入賈人珠及故出署丞罪廢爲民徙嶺南終欽州別駕從
子思禮武后時爲箕州刺史少學相人於張憬藏憬藏謂思禮歷
刺史位至太師萬歲通天二年授箕州益喜以爲太師位尊非佐
命不可得乃結洛州錄事參軍綦連耀謀反謂耀曰君體有龍氣
如大帝耀亦曰公金刀當輔我陰約君臣思禮因以術眩衆見者
必曰當三品使嗜進者充望然後云綦連耀且受命公等皆因之
事敗武懿宗按之陰弛思禮禁使多逮引思禮冀自脫悉引素相
忤者將刑猶不寤與衆人斬於市其知名者如李元素孫元亨石
抱忠王勳勳兄勛路劭淳等三十餘族竄逐千餘人

錢九隴字永業湖州長城人父文彊爲吳明徹裨將與明徹俱敗
彭城入隋以罪沒爲奴故九隴事唐公善騎射常備左右兵起以
功授金紫光祿大夫從戰薛仁果劉武周擢累爲右武衛將軍
從平洛陽佐皇太子建成計劉黑闥魏州力戰破賊以功最封鄆

國公以本官爲苑游將軍貞觀初爲眉州刺史改巢國卒贈左武衛大將軍潭州都督諡曰勇陪葬獻陵

樊興安州人以罪爲奴從唐公平長安授左監門將軍從秦王積戰多封管國公數賜黃金雜物後坐事削爵貞觀六年陵州獠反命討之爲左驍衛將軍又從李靖擊吐谷渾爲赤水道行軍總管後軍期士多死亡失器仗以勲減死後爲左監門大將軍襄城郡公太宗征遼以興忠謹副房玄齡留守京師檢校右武侯將軍卒贈左武侯大將軍洪州都督陪葬獻陵

公孫武達京兆櫟陽人以豪俠稱爲隋驍果兵興武達至長春宮上謁從秦王討劉武周苦戰功多累遷秦府右三軍驃騎封清水縣公貞觀初爲肅州刺史突厥騎數千輜重萬餘入寇謀南趨吐谷渾武達以精兵二千人與戰虜稍却復殊死鬪薄之張掖河潛命上流度兵虜已半濟乃兩岸夾擊斬溺略盡墮書勞之遷左監門將軍鹽州突厥叛詔武達趨靈州追及賊賊方度河乃據南

涯陣武達擊之斬其帥可邏拔扈進封東萊郡公終右武衛大將
軍贈荊州都督陪葬昭陵諡曰壯

龐卿暉并州人從討隱太子有功拜右驍衛將軍邦國公卒追改
濮國子同善右金吾大將軍同善子承宗開元初仕至太子賓客
張長遜京兆櫟陽人精馳射在隋爲里長以平陳功擢上開府累
遷五原郡通守遭亂附突厥突厥號爲割利特勤義兵起以郡
降即拜五原太守安化郡公徙封范陽時梁師都薛舉請突厥兵
南度河長遜矯作詔與莫賀咄設以伐其謀會唐使亦至突厥兵
不出武德元年詔右武侯驃騎將軍高世靜聘始畢可汗至豐州
而始畢死詔留金幣不遣突厥怒引兵南至河長遜遣世靜出塞焚
之且若專致賄賜者虜引還授摠管改楊國公及討薛舉不待命
輒引兵會賜錦袍金甲或譖長遜居豐久恐與突厥爲唇齒乃請
入朝授右武侯將軍徙息國公加賜宮人綵千段屬有疾高祖親
問之後竇軌率巴蜀兵擊王世充以長遜檢校益州行臺左僕射

歷遂夔二摠管政以惠稱貞觀十一年卒

張平高綏州人爲隋鷹揚府校尉太原遂預謀議從唐公平京城累授左領軍將軍封蕭國公貞觀初爲丹州刺史坐事以右光祿大夫還第卒追封羅國贈潭州都督

李安遠夏州人父徹隋上柱國雲州刺史世爲將家以財雄安遠少無檢與博徒游至破產晚乃折節嚮書從士大夫苟勝已必傾心交之襲爵城陽公與王珪最善珪坐王頗得罪當流安遠爲營護免後補正平令兵起攻絳州安遠與通守陳叔達嬰城拒唐公素與安遠善及拔絳撫慰其家引與同食授右翊衛統軍正平縣公後從破屈突通進上柱國右武衛大將軍數從秦王征討積功累封至廣德郡公奉使吐谷渾安遠與約和吐谷渾乃請爲互市邊場利之隱太子將亂陰使誘動安遠介無貳志秦王益親重貞觀初嘗命統邏驛都下督盜賊歷潞州都督懷州刺史皆以幹用顯然急刻少恩由是損名卒贈涼州都督諡曰安追封遂安郡公

馬三寶性敏獯事柴紹為家僮紹尚平陽公主高祖兵起紹間道走太原三寶奉公主遁司竹園說賊何潘仁與連和潘仁入謁以百兵為主衛三寶自稱摠管撫接羣盜兵至數萬唐公濟河授三寶左光祿大夫秦王至竹林官三寶以兵詣軍門謁遂從平京師拜太子監門率別擊叛胡劉拔真於北山破之從平薛仁果與柴紹擊吐谷渾於岷州先鋒陷陣斬名王俘執數千以功封新興縣男後高祖幸司竹園顧謂曰汝與兵處邪衛青大不惡貞觀初拜左驍衛大將軍進爵為公卒諡曰忠

李孟嘗趙州人終右威衛大將軍漢東郡公

元仲文洛州人終右監門將軍河南縣公

秦行師并州人終右監門將軍清水郡公

贊曰應龍之翔雲霧泠然而從震風薄怒萬空不約而號物有自然相動耳觀二子非有踔越之姿當高祖受命赫然利見於世故能或翼或從尸天之功云文靜數履軍陷陣以才自進而寂專用

串昵顯外者易乘邇者難疏故文靜先被躁望誅寂後坐詆言
斥誠異夫蕭何曹參矣

劉裴列傳第十三